



公諱之永號有筠字伯言性剛直見義勇爲遇不平事
輒侃侃辯論人莫敢犯值倭夷擾攘邊疆未靖公奮然
曰士苟可展夙抱有裨民物奚事取巍科掇高第爲遂
棄舉子業以國學授都督府右衛經歷凡所策畫悉合
時宜時軍糧濫冒空名支餉當路者計無所出商於公
公爲按例給領無分文濫與軍弁帖服後卽以公所條
陳者著爲令積弊一清轉通判因病告歸卒於家

曉川五十六世庠生士早公傳

信紋

公名士早諱一驥字公展狀貌魁梧資性敏捷過目成
誦爲文雄健精悍俯視一切人學後有聲黌序間工韻



語駢體壯遊吳越於湖山之勝花月之場吟詠輒成卷
帖蠅頭細書盈尺滿篋許士衡者吳中佳士也相遇於
寒山寺遂訂交花間分韻有虎阜唱酬集二卷惜散失
未窺全豹一瓣之香今猶奉之不忍釋手也

曉川五十六世庠生士晉公傳

信紋

公名士晉諱一駿字公帶公展仲弟也幼受學於伯兄
文筆拔俗入泮後因體羸弱絕意進取不事帖括以詩
自豪家故殷實畫棟連雲牙籤滿架古帖名畫閱者如
入五都市目不暇給交遊日廣往來皆風雅士座客常
滿刻燭賦詩拈闈分韻一題恆數吟一韻恆數疊得句

輒呼酒酣飲連宵達旦暇則偕一二吟侶冒雨訪菊踏
雪探梅翩翩有世外意迄今人多艷之未嘗不掩卷而
想見其人也

十 曉川

五十七世

儒林郎恭墳公傳

賜進士署廣東雷瓊道

鮑

鯤

公諱恭墳字開仲天性孝友慷慨任氣家素貧棄儒就
賈嘗購木於吾浙之開化縣有王氏兄弟構訟累年公
訪聞其兄弟析居各得一山兄山木值六白金弟山不
踰四百公語其弟曰奈何以小故而戕骨肉乎吾亦以
六白金爲爾購之王氏感其義式好如初又嘗與德清
陳萬年共賈於仁和賬籍皆公掌理萬年死子四齡公

載其賬籍并萬年應得子母千八百餘金躬致萬年家
分毫無所私萬年妻沈願以百金謝公歎曰使吾欲得
百金何如千八百之多乎老年家居率羣季創建敦彝
堂祖祠廣置田畝爲清明祭掃之費祠右構敬業齋爲
後人讀書所生平好讀綱目一書雖在市廛手不釋卷
督學朱笥河先生錫以望重儒林扁額公往來吾杭五
十載與余交最厚故得悉其生平云

曉川五十一世儒林郎寬倫公傳

賜進士屯田司主事李承端

公諱寬倫字汝彝我婺善人也父開仲於浙之開化十
七都置莊田若干畝開仲公年老不與家政弟曉溪先

生爲名諸生刻苦力學亦不習會計故田租事皆公任
之家距莊九十里向以往來便捷恆運穀歸家及見近
莊多貧民乃罷運穀減價給諸佃以其餘者濟鄰村鄉
人至今德之族有光啟堂祠屋將圯公曰吾父於家祠
敦彝堂無憑藉而創建之況有基者乎謀諸猶子信紋
信緯并力捐金而祠宇告成其他義行大率如是與洪
安人偕享大壽孫曾林立四世一堂族戚中咸以爲報
施不爽云

曉川

五十八世

儒林郎寬仕公傳

堂脈學史李承端上人

先生諱鯨譜名寬仕字際可曉溪其號也性篤於孝友

誠樸

孝友鄉黨咸重之爲文學曾南豐深厚粹美類其爲人
浙儒趙赤繡以老友目之梁中堂視學安徽拔先生入
邑庠以文行舉優等乾隆甲子應江南鄉試舟過燕子
磯巨浪掀天先生歎曰二親老矣奈何數蹈危地自此
遂絕意進取閉門養親怡然自得時或賦詩以陶冶性
靈玉臺西崑雅所不喜嘗誦范文正公不爲良相當爲
良醫之語究心岐黃術廣搜葠朮製丹丸活人無算好
施予告貸者不受券曰子能償何必是人以爲較之馮
煖焚券識尤卓也喜交讀書人有窘迫者必餽之金帛
生平成人婚姻完人骨肉息人爭訟多費重貲先生艱

於嗣三索不育置遶室聯舉三女人爲不平曰天道福善如斯人而乏嗣乎五十二歲生子梅嶼又三年生霞軒先生仁恕寬和不畏強禦不凌孤弱不以貧富重輕人恂恂如閭閻如雖輕躁狂妄子見之靡不歛容就範有不知其所以然也嘗語家人孝友睦婣任恤一生行之不盡訓其子曰昔然有言聞一善言見一善行行一善事此日方不虛生先生以嘉慶己未年歿得壽六十有三丁卯續修邑志採先生實行入隱逸傳先生之德史乘具詳固不俟承端縷述也

曉川五十世儒林郎信純公傳

弟信紋

伯兄諱信純字熙大生有至性髫齡孝讓及長好行善
事遇人急難不吝施予嘗客錢塘值江潮迅激覆十數
舟兄持金立江岸呼居人習水者曰能拯一人者予二
十金得屍者半之人高其義爭駕小舟往救得全活者
十二人得尸五人金不足質衣益之又嘗泊嚴瀨有婦
人號而赴水詰其故則夫爲訟累負債百金將鬻婦以
償兄檢行橐得百七金予婦人曰以百金償債餘與而
夫爲負販資當可活婦人得金喜而拜謝將舉首問姓
名而兄已解纜去矣至今嚴江居人猶有能道之者然
尙未知其人爲誰何也

曉川六十世敏教公傳

武林許錦春

公諱敏教字允敷號耐庵篤於孝友家庭間藹如也幼入塾記誦不上十行而好學不倦常從學於蕭江雲湖孝廉董薌泉孝廉吾鄉趙銀槎進士咸以大器目之爲文酷似方朴山奧衍精刻不屑屑求合於世遵例捐浙江商籍國學生應丁卯戊辰庚午浙江鄉試不得售癸酉錄遺畢以疾終於杭得年三十有二子巨茂巨芹巨英皆能讀父書巨芹甫十二齡骨秀神清爲文尤清雋可喜哲人有後其信然矣余與允敷交最厚哀允敷一生顛躓竊願其子取青紫如拾芥庶足慰允敷地下也

曉川

五十八世

文林郎寬位公傳

左都御史

汪廷珍

庚辰春門人江孝廉之紀計偕北上謁予於京邸以其
 尊人素亭先生家傳請且曰之紀不才不能為親身後
 榮念可以信今而傳後莫如夫子之文先君子終身里
 閭無竒節偉畧震耀當世之紀不敢妄有稱述自誣其
 先人以取譏於識者顧自趨庭以來習見先君子之處
 心制行有足為子孫彝訓者請畧陳其梗槩先君子幼
 誦儒書通明大義意象迥然度越流輩尋以家口日繁
 先大父年漸高乃承親命棄舉子業寄跡市廛間先大
 父治家嚴鮮能當意者惟顧先君子則色然喜每曰汝

善承吾志後當有興者先大父年踰九十棄養時先君子年六十有四哀慕之忱感動行路家世有木業在錢塘先君子司會計垂三十載忌其能者謂其私囊必豐殖百口一辭牢不可破及析居之日先君子貲產乃猶薄於諸昆季數年間遂至空乏其在錢塘也多與其賢士大夫游鄉人之客其地者咸倚以爲重有大事咨而後行家居後饗煢或不給閉戶觀書夷然不以屑意之紀甫垂髻卽擇明師使從學旣而試久不售有徙業意先君子以書戒曰士以立身積學爲務科第非所計也昔康節以布衣從祀兩廡豈論名爵哉其後之紀爲諸

侯客餽口幕府間歲時手諭恒諄諄以潔己自愛慎無干預公事爲勉及之紀登賢書或問先君子何德所致答曰是奚足言然生平可自信者惟無私心無隱慝耳聞者咸韙其言其他礪廉隅重然諾睦婣任卹諸行鄉黨宗族類能稱道之固毋庸僂指數也予聞而異焉夫古之所謂賢人君子者豈必盡以文章功業表見哉行之於身而無愧修之於家而可法能如是是亦爲完人矣今觀先生之能色養也知其孝觀其教子有方也知其慈觀其處脂膏數十年而分毫不以自潤也知其廉潔而方正彼夫文章功業烜赫一時而考其實行有爲

君子所羞稱者聞先生之風亦可以興感矣遂書以爲
傳亦望孝廉之始終勿忘庭訓也先生諱寬位字俊英
素亭號也婺源人

五世

涇東白花夢彩公傳

胡書紳

師行

廩膳生江公筆卿諱夢彩尊三公次子也生而聰穎善
承祖父志於書無所不讀其自四書五經以及左國史
漢一切有益於身心性命諸書無不潛心體玩務採摘
其精華而吐棄其糟粕發爲文章每試必列前茅雖遺
稿未刊而其文實卓卓可傳且夫文藝末也至降而爲
八股尤末也士君子窮居閉戶上之不能潤色鴻猷至

求之閨門之內庸行之常一舉一動一色一笑又不能
踐履篤實折矩周規一一可爲鄉黨宗族法雖工文藝
何取焉公居家以孝友著聞日以經史課子姪故其家
多能文之士生平重氣誼崇節儉恤孤寡慎交遊其於
隆師親友之道待人接物之規莫不本之先儒根於德
性未易以一二端數故其子孫世世守之至今弗墜噫
觀其家政其殆德行道藝兼之者乎余與公相交最久
見其闊大處有細密和婉中寓謹嚴砥礪廉隅遠絕世
俗其風裁之嚴毅不必定在獨處齋居也卽有時高朋
讌集酒酣耳熱興會淋漓其自縱談經史外從不聞有

一市井語出諸其口夫人必有真性情而後有真學問
有真學問而後有真文藝公之著作足以傳世行遠殆
亦其性情學問之所呈露豈世之剽竊陳腐尋章摘句
者所可同日語歟公元配胡氏余族女也性貞靜善相
夫教子井臼自操雖處富盛不異寒素以視古賢媛何
多讓焉公四子其少子名松者從余遊雖抱才未遇而
卒能與其諸昆弟子姪紹前啟後以文章世其家其將
來又曷可料歟茲因重修族譜後人恐其久而失傳也
爲敘其生平大概如此以俟有識者覽焉

五十九世平園漢臣公傳

董正治

嘉慶戊寅予居山中蕭寺有江君執其者述其先人漢
臣公生平行誼公天性醇厚有古人風母沒哀毀盡禮
純孝之稱嘖嘖至其拓土宇增堂構承先啟後皆其餘
緒生平惜孤矜寡濟親睦隣勤以創業和以處眾能使
浮薄不靖之徒聞風而知愧也至於內助尤賢克嗣徽
音舉丈夫子七類皆魚魚雅雅執其能讀父書飛黃騰
達指直顧間事天之報施善人固應爾也

五十八世 白花承瑄公傳

吏部尚書 趙青藜 星閣

先生江姓諱承瑄璣仲其字也天性純篤不求聞達生
九歲而孤母葉太君以訓以育迄於成人好學問工文

章顧嘗痛先君早背不得稍展人子之心而太君獨持
家政積勞多疾遂棄舉子業專精於醫太君服食起居
之宜寒煖之節必兢兢省視偶有微疴調護愈謹故太
君以積弱之體而康甯壽考享年七十有餘者先生善
醫之功抑孝思所致也顧先生心力亦旣瘁矣太君卒
哀毀骨立尋亦卒年五十一子三長大宗次岱宗三可
宗岱宗業儒先生爲延名師課讀今年甫弱冠亦能文
章殆將有以成先生之志云

贊曰先生仁孝人也旣以太君故棄學工醫人以疾求
診者日數先生察脉辨色多所全活或有餽遺辭弗受

遇貧窮輒施藥不計值其平居言論行事多可稱述茲特論其大者 乾隆甲午季夏

鄱陽孝子德周公傳

陳曾 孝若

或言去此數里有江孝子者要予往拜之予曰孝子何如曰孝子母死葬於野哀弗能歸遂廬而止焉二年矣有弟任耕朝夕給孝子粥一盂有婦在室不相見計且去之終日墓傍持齋誦佛號里中從而化者二十有一人悉持齋如孝子予曰噫此又一陳孝子矣不往可也陳孝子者馮冲人初亦如孝子卒廼舍身空門者也他日方君維春固要予往訪之一時從者十餘人至則孝

子之里人肅衣冠而導余入孝子骨立跪於墓側十餘人者皆從予肅然下拜孝子稽首謝如禮已與十餘人者偃僂藉坐墓間余乃呼孝子曰孝子孝矣亦知何者孝何者不孝乎孝子泣謝曰余烏知孝顧念吾母晚而生我貧且盲遭世亂負之東西逃者數年無甯日今竟死余心痛不能忍烏知孝予曰噫誠然孝可弗言卽與子言不忍汝不忍於母矣卽又當思母不忍於汝對一坏土不能去不聊賴以爲生母必不忍汝不耕賴弟以給汝給雖廉弟已困母又必不忍母見汝有妻而遣之終斬汝後母又必大不忍且汝思此一坏土使汝有子

子復有子歲歲升邱以嗣續汝者孝乎沒汝之齒遂使
此邱化爲榛莽者孝乎且汝之生也亦有父耳亦有母
耳彼佛者胡爲來哉以吾聞於先王之教三年之內不
飲酒不茹葷不入內可也耕而食何不可也永棄妻子
絕人道如之何其可也言旣孝子似不甚省他日門人
陳伸以書來曰甚矣先生之能移人也孝子憬然矣日
出其僭弟作日入返於廬計以來歲三年之喪畢而復
其常里中二十一人者亦悟其初入之言之不盡然而
思先生之言也予喜而呼二三子曰凡予所斷斷於孝
子者以辨其惑也以彼負母而逃者五六年母死又致

其哀思如此汝見今之人甯有是乎使此二年中一念不續則懈且立見而彼能如此古之江革王裒不是過矣遂書爲孝子傳孝子名德周字行修鄱之兆田里人

五十六世涇東白花寄公傳贊

賜進士順天府尹程盛修

君諱寄字公任世居涇之東鄉爲人優柔樂易篤於孝友事父母以色養先事承意左右無方父病親醫藥問疴痒晝夜勿懈病亟禱神祈以身代卒之日椎心躃踊幾不欲生每哭奠輒勺水不入口神情忽忽如赤子之思慈母以此哀毀漸見骨立不暮年而卒嗚呼孝矣君於昆弟中年最長經營家計凡事關重荷輒以身任一

切分梨灼艾推肥取瘠同居四世無間言居常與人無
忤而持家節儉飲食衣服不敢稍過至若修道路周里
黨雖傾囊弗惜君故素封又精計然術往來吳楚間億
則屢中以嗣續繁庶爲廣增田產置第宅以守成兼創
業卒年五十有九室汪氏子四善蕙善倬監生孫十三
承泗庠生承清監生 贊曰 聖水洋洋一峯蒼蒼公
處其間躋美馮唐詩書式訓蘭桂齊芳振振繩繩厥後
克昌維公之德源遠流長 乾隆丁亥仲春月

五十七世 白花來公傳

胡

筠

百門人

公諱來字遠公德公子也德公少孤貧服賈事母母病

劇延醫診視不效割股和服幸痊如是者三左氏太孺
人得享壽考德公沒公事母郭氏如德公生平重節俠
排難解紛賑貧恤匱創建宗祠置祀田百畝配王氏肅
慎慈惠生七子或聲蜚藝苑或名重成均嶄然皆見頭
角公享年七十有八王孺人七十有三贊曰遠公
降生地效其靈厚儲厥德剛方不淪正直是守冲抑戒
盈艱難締造子孫振振
惠爾花園
五十
八世文遺公行狀
婺源縣教諭
金淑

公諱文遺字書萬不慕榮利徜徉泉石故自號耽溪所
以志也自予秉鐸星江按月觀風首拔公次子士漪佳

卷嗣是士漪來謁論文之暇因述公生平行實予聞之
肅然起敬願一望見顏色而公天趣迥別雖冷署不肯
惠顧也來歲小春爲公五秩壽辰予擬於此時登堂祝
嘏親接芝眉用爲快慰詎今六月公以暑疾沒嗚呼哲
人云萎曷禁臨風潛然也士漪以行狀請余按公始祖
澣公宋兵部尙書贈銀青光祿大夫歷世以來簪纓不
絕公之祖諱德仁字義先恪謹謙和爲鄉里稱誦祖妣
許孺人賢內助也公父諱起相字子儀康熙間道經富
村遇鬻妻償債者傾篋代償其人問姓字不以告雙溪
要津翰祖置義渡又同弟起棕捐置祠產魏郡侯贈額

德冠天都郭邑侯贈額德媿商皓均非溢美也公母出
雙溪王氏名門淑質公自幼聰敏習舉子業文筆拔俗
因體羸遂無意聞達優游林下惟以敦本睦族爲心乾
隆十六年歲饑公購米散賑待舉火者不下百戶而公
無德色公四十四世祖茂公葬吳老坑口被葉姓砍木
屠塚公爭訟十餘年心力交瘁必清界保業造塋妥魄
而後卽安舊歲創修祠宇未落成而公病易簀時猶諳
囑後人繼志高奢永德橋下市聚星橋以及施棺濟茗
等事公皆倡捐出爲領袖尤難殫述公生於康熙丁亥
十月十九日歿於乾隆乙亥六月二十日享年四十九

歲公娶清華胡孺人淑慎温恭子三人長士泮娶金氏
次士漪娶李氏三士洵幼女三人長適鳳山查姓次適
沱峯齊姓三幼孫男長嘉懽次嘉愉

花園五十九世士洵公室朱節婦傳

廬江縣教諭朱學楷

余與孺人俱紫陽裔也孺人為余族鳴雲公女幼嫻姆
訓適源溪藻亭公為繼室鄉里稱賢內助藻亭公早世
孺人年僅三十有七子嘉忻方在抱姑年老病癩癩扶
老携幼在在需人孺人固有萬不能以身殉者夫沒後
事姑益謹每日禱神冀愈姑疾求姑壽如是九載無一
日怠而孤燈岑寂矢志靡它其節而兼孝若此他如和

鄉鄰睦妯娌勤儉持家撫孤成立斯誠四德具備者歟
予兄博士學彬贈額曰節勁松筠孺人生於乾隆丙辰
正月十三日酉時歿於嘉慶庚申十月初十日子時享
壽六十五歲子嘉忻孫振晨

墓首花園六十世嘉忻公行略 弟嘉瑋二十

余堂弟嘉忻字懷偉五齡失怙賴節母朱孺人撫孤成
立稍長事母有至性善與人交爲人排解紛難無德色
娶李氏嫻於姆訓獨屢孕不育朱孺人重慮之微示置
妾意弟念伉儷之情與慈母之訓頗難自決輾轉思維
夢神授小盒曰以是爲而子啟視之內一小青蟲委婉

河陽治邑志卷四
可愛後果舉一男母壽六旬弟請於世襲博士朱公學
彬贈額曰節勁松筠鄉黨謂弟能顯揚也母歿喪祭如
禮年四十八卒李氏有遺腹復舉一男弟已不及見矣

曉川

五十五世

王桂公室胡節婦傳

武林

趙

杭

節婦年十六歸江君玉桂桂家無宿春節婦能安貧盡
婦道事舅姑以禮舅姑沒哀毀備至閭里賢之年二十
三生子滿叢滿綦越二年桂卒時節婦懷孕六月明年
舉滿荷節婦晝夜慟哭懼三孤無以成立也於是灌園
鬻蔬燃燈紡績其飲蘗茹荼較夫在日又倍蓰矣後綦
少殤叢客死於吳荷舉子五人即開仲先生昆季節婦

享年七十三事載邑志今曉川江氏惟節婦後稱盛

曉川五十六世滿熙公室汪節婦傳

滿熙公家故貧節婦相夫子事舅姑致敬盡禮人無閒言結褵九載公死於浙遺孤恭境甫四歲節婦灌園鬻蔬撫養成立娶媳洪氏甫得孫而境又死節婦痛哭不絕聲未幾亦歿媳洪能繼姑志苦節撫孫族人稱一門雙節云

曉川五十九世信綱公室俞節婦傳

節婦年二十歸公時姑早歿舅病癆沉痾卧床已十四載節婦曲盡孝養久而不怠撫小姑小叔經營婚嫁不

貽堂上憂仁孝所感舅疾為之少瘥乾隆辛亥冬綱歿
節婦年二十四哀慟幾瀕於死明年春舉遺腹子敏敦
節婦黽勉孤撫至於成立事舅益孝謹貞靜自守行不
踰閭嘉慶丁卯節婦歿計苦節十七載是年續修縣志
族紳高其節聞於邑宰趙公載入列女傳

曉川五十九世南春公傳贊

程雲路

士君子不求聞譽於知交而聞譽自至不邀頌禱於梓
里而頌禱愈殷如我梅嶼公者父兄宗族稱其孝州閭
鄉黨稱其仁豈無故哉嘉慶庚辰公主修統譜勞心瘁
力夙夜不遑可續者續之無贊助者之致江村父老奉

公長生祿位於大宗祠公之甥俞蓮友爲繪椿枝永壽
華萼長生二圖先君子豔其事作徵詩文啟有曰公生
性剛直忠厚聰明好交遊人咸敬服等語觀於族人之
重公並迎其封翁際可公春秋配享令弟霞軒公亦生
迎入祠一族之眾心悅誠服不誠創聞而罕見乎路承
先君命陪對鯉庭奉公教誨三年於茲公嘉言懿行可
得而畧舉也公少失怙事母孝見於九哀詩自敘文內
公嫡母生母相繼逝庶母程太安人壽屆九旬同堂四
代及其歿也以不忍遽葬故留柩八年朝夕侍奉事死
如生其孝行有如此者公昆季二人問衣問食至老不


衰顏其居曰敦誼堂又曰敦友堂怡怡之情令人猶可想見其友恭有如此者公之待人也矜孤恤寡濟急憐貧常作不平之鳴不爲阿唯之習其剛毅有如此者公與姚西翰林劉星轅遊而翰林又與督學汪巽泉友呈覽公之著作及生平行事汪君爲之贊賞贈額理學名儒其器重於搢紳先生有如此者公精岐黃活人無算匪惟不受饋遺遇貧乏者並施送藥餌行浩大之陰功積無窮之福蔭其仁慈濟人有如此者公賦詩見志感物興懷著有靜寄軒詩鈔靜寄軒文集易書詩解憤事詩駢體文四餘詞尺牘時令大全日記醫說歷朝詩選

等類其長於文藝有如此者公書法秀潤遒勁得其片
楮者咸珍重之又手繪春江垂釣荷池飲酒秋月彈琴
梅林走馬各圖題詠甚衆鐵筆篆刻亦淵雅有法度其
優於技能有如此者咸豐壬子公欲復修濟陽統譜明
一本九族之遠近序千支萬派之源流文啟已發兵亂
未舉越八年而公下世矣今日手澤猶新譜修如舊公
雖去而原啟尙存譜續修而公志亦遂矣况冢君他山
仲君數峰少君小梅躬爲領袖其殆善繼述者乎今江
氏家乘將竣事矣路不文忝居戚末敢不敬誦之曰
懿哉太翁名重望隆多才多藝追遠慎終宗人浹洽合

族欽崇祿位不朽饗祀報功鬚眉猶活德行可風哲人
有後福蔭無窮 同治己巳孟春月

附謝坑族衆議券

江村承佑祠支裔等緣二十九世始遷祖洪公肇跡江
村忠孝傳家至潛澣二公兄弟尚書支裔漸盛潛公裔
遷曉川今其支孫增廣生梅嶼宗臺秉性方直凡遇族
中艱鉅不憚勞瘁力挽頽風世代雖遠親若同堂路道
雖遙近若咫尺夫以孝友待本宗本宗亦當以禮酬報
僉議迎令先尊優附貢生 勅贈儒林郎布政司問理
際可公神主入祖祠春秋配饗并於祠內立梅嶼宗臺



及令弟國學生布政司理問霞軒宗臺昆仲長生祿位
遞年清明祭祀頒胙給餅以垂久遠以彰功德以爲族
之後來者勸立此議墨永遠存照

道光癸卯清明日承佑祠支裔

維高國華濟曙濟煥長民美保呈美璇美
承美巨輝巨經巨荷巨葵巨璵巨和

附南春公紀事詩

謝坑水木溯根源別派支分到曉川自宋元明今四代
願兒孫子歷千年聿追舊緒光前烈勉繼先人望後賢
翹首祠堂遺澤厚祖宗功德敢忘旃
傳家秋實誰無忝處云春華我自知一世忙因憑血性
十年苦已透心脾情關族誼同憂患謹守家風溯翼詒

消受香煙身及見街談巷議口成碑

仰瞻椿樹八千秋葉落歸根終古愁忽發新枝春意透
正如枯木綠陰稠年年祭祀分昭穆世世清明進膳羞
差慰先人泉下意無疆從此卜惟休

昆季雙雙連理枝犧尊薦醴雁行隨在生親見長生位
若死人如未死時自愧無功難受祿何來報德永無期
多情過愛真無已答謝私衷感賦詩

又清明日先君配饗頌卮附族議卷懸像祭告賦此

升堂展拜轉淒然膾肉馨香列几筵可喜盛名傳奕禩
難忘失怙各髫年水源木本垂弓治春禴秋嘗享豆籩

陟降於庭應莞爾聊將奉養補生前

一門又

俞運友甥師言因前事繪椿枝永壽華萼長生二圖程紫垣姻台文奎父爲文徵詩因斯此

椿枝永壽圖

長對真容掛錦堂不勞岷岵陟相望形聲永隔悲無限
模範猶存矢勿忘枯木逢春偏有色好花雖老尙聞香
倩誰假我傳神手寫出千秋身後光
雨練風揉歲八千蔭如華蓋自年年稱觴願頌無疆壽
觀畫惟思不朽傳根厚果然枝葉茂神完何礙雪霜煎
有心松柏符今古一例青蔥庇曉川

華萼長生圖

傳家和睦最關情義重財輕浪得名祖父以來留隱德
弟兄何幸各長生我思葛藟滋慚愧人比梅花更寵榮
從此披圖徵異事漫誇賈棣與田荆

髫齡步履與追隨如影依形不暫離相守百年同此願
作朋三壽豈難期樹名連理心田種花結同心世德滋
飲水源頭思一脈詩成付與後人知

又謝程紫垣俞蓮友作

長箋巨筆細磋磨叙事言情廣網羅雙管千秋驚五岳
一門兩世慶三多大江南北傳佳話滿紙琳琅贈雅歌
吏部文章摩詰畫寸衷感謝竟如何

附題圖詩

聶華國 文軒

百尺靈椿挺特生况兼棠棣並敷榮恒春樹茂含花萼
交讓枝聯應弟兄夙有惠風薰里黨同綿世澤耀宗枋
更思喬梓分高俛添得新圖一幅成

附捐置祠租記

謝坑族姪

巨和 協邦

公 諱南春字錦章號梅嶼譜名信紋弟 諱信緯字彩章
號霞軒世居婺東曉川係三十一世祖潛公分遷和係
潛公弟澧公裔居本族謝坑江村相去四十里許累世
親睦公生平孝友輕財重義族中鉅細事務質之於公
無不盡力扶持有外侮者禦之有紛爭者息之其功德

難以枚舉族人愧無以報於道光癸卯仲春謹具請柬
迎公暨弟霞軒公生主人承佑堂祖祠奉爲長生祿位
以彰公德並追慕公父封翁際可公德義尊隆亦同迎
主人祠配饗公乃慷慨捐資囑和等代置田租貳拾壹
秤零以爲春秋祭祀之費租由祠收稅糧亦由祠納遞
年清明頒給餅脍送奉公宅以垂久遠茲值修譜和不
敢有負公德故將公捐置田租字號稅畝土名稱數悉
登譜牒俾億萬斯年相傳不朽云

計開捐租土名字號稅畝

黎字乙千六百三十一號

坐落中村土名后坑
計稅八分一厘二毫

骨租九秤

黎字乙千六百三十九號

坐落中村土各后坑計稅陸分七厘五毫

骨租七秤

黎字貳千四百七十久號

坐落江村土各新田塆計稅三分四厘三毫

骨租二秤

黎字二千四百七十九號

坐落江村土各掛壁金釵計稅三分五

骨租二秤

黎字貳千六百二十三號

坐落江村土各柏塚下計稅乙分四厘四毫

骨租壹秤半

共田五號共租二十壹秤半共田稅二畝三分二厘四

毫其稅糧北鄉十二都二圖四甲江統宗戶完納同治

乙巳孟夏月巨和謹識

曉川五十九世信緯公傳贊

庠生程

清鏡如

歲乙巳清館於曉川之聲馥軒風扇微和日融新暖偕

諸生講解左氏鄭伯克段於鄆及石碯諫州吁諸篇甚

醴醴也門扉乍啟有步履聲江君卓庭至酌茗列坐於
諸生所講書凝目流覽俄而有感於懷語清曰吾族夙
有霞軒公者諱信緯字彩章霞軒其號係際可公嗣兄
弟二人公居次長即梅嶼先生公生甫九齡其尊人卽
世賴母氏養育成人及長兄弟怡怡戶庭之內藹然大
順性樸素服賈於粵東浙西積貲捐六品銜娶洪氏產
一女遂歿繼娶俞氏畢氏畢未有所出俞生子十人長
次幼未育餘皆寓愛於勞教養成立人咸羨之公精究
岐黃有患病求診者無論疏戚從無拂人意或無力醫
治則輸金以濟之壽古稀精神益壯矯然有健翮冲霄

之概顧吾始以爲人事之常若無甚異今觀鄭莊衛州
吁之已事同室操戈自相殘賊而公兄弟父子之間不
乖天顯之常不失義方之訓殊令人不禁心儀其芳徽
也清應之曰此所謂善足以感人者適公二嗣君少霞
來囑輯公傳贊清曰尊翁往矣而其實迄今流傳於
宗族鄉黨間卓翁剛樂敘之矣請卽以聞於卓翁者書
以爲傳 贊曰 曉川之村奄有達尊如玉有現如蘭
有蓀成性存存其恭溫溫道德爲藩孝友培根方便施
恩疾苦手援頭銜爛門有耀椿萱口碑頌喧歡洽輿論
有穀詒孫垂裕後昆 同治己巳仲春月

曉川六十世敏攻公傳

賜進士知
徽州府事

林廷選

傳者何傳也傳其人傳其事也江生之可傳者何孝也
義也勇也余知郡事時歲在己未江南鄉試補行於浙
聞江生父諱南春公增貢生星江宿儒也因赴浙試獲
疾終於徽間公所時已殘冬矣江生於初冬遭內子之
喪殘冬接失怙之信而對萱幃白髮未敢明言凶報馳
徃武林奉歸旅櫬又值髮賊竄擾臨安城郭人民盡遭
屠戮而江生之總角友時爲兩浙藩司王月川方伯剛
死於難江生獨於亂兵中置死生不顧而必盤回旅櫬
者其心祇知有父耳時錢江無片帆江生至誠格天若

有神助歸舟未抵里門又接母太安人仙逝之報呼天
搶地哀毀骨立而附身附棺祭墓盡禮江生之數特奇
江生之孝亦云至矣斯其孝之可傳者一江生少讀父
書屢試不售棄儒就商厯遊粵贛蘇杭海洋能殖財能
散財揮手千金惟義是視淹留異地者解囊以贈行客
死他鄉者饋賻以助葬居恒恂恂而一遇地方義舉無
不竭力提倡江氏同治譜賴公贊成之力爲多斯其義
之可傳者二江生性剛直而慈祥志氣超邁而沉毅生
平不爲利回不爲義疚而蟠根錯節艱苦備嘗髮賊自
江右擾徽州盤踞婺城半載江生奉前江西巡撫部院

張命於永安局團練民勇身先士卒衝鋒陷陣捉將擒
梟援助官軍掃除羣盜而義勇無前之概磊落不衰不
惟余見而嘉之即張撫帥亦為之奏請保舉江生讓之
再三推與團局同人略無矜伐意斯其勇之可傳者三
夫以江生之孝江生之義江生之勇可傳如是余嘗巡
視婺東見而知之非等諸耳食者知之而不傳不為之
立傳以傳將有愧於好賢樂善之意况聞江生家政上
慈下孝雍穆一堂其德配方安人出正學之名門歸巨
孝之望族姬姜閩範鍾郝母儀是亦江生之賢內助也
惜乎不永年也安人性恬靜慈淑能修內政江生名岷

山譜名敏攻字子堅他山其號也昆玉五人江生居長
子四森森如階前玉樹他日鴻翩鵲起未有艾也余於
解組之日贈之以聯而復爲之傳同治己巳春月

曉川

六十一世

雲龍公傳

四品卿銜內閣中書

夏

炘

張甫

婺地山環水複間氣特鍾道光季年炘視儒學事於此
一時薦紳先生相往還類多彬彬儒雅曉川江君非池
爲婺東宿學諱雲龍譜諱巨芹字藻如非池其號也五
齡失怙賴母氏撫字成人垂髫時便能曲盡子職承母
氏歡稍長遊里塾篤志詩書年十二遂有文名族老修
甫先生嘗以千里駒目之其爲文一縷清思深摯刻露

蓋倣樸山而探其奧者歲乙未應沈學憲試拔入邑庠
後塵戰棘闈屢薦不售泰然無怨尤昆季早世教養諸
姪無異己出姊適鴻村洪懷川產甥男二女一方數齡
懷川遽逝姊以過哀致疾逾年亦歿君撫育諸甥十數
年咸爲婚教宗族鄉里間有紛爭構怨者力爲排解任
勞任怨均不遑恤子六人長模四棨五業六櫬俱不幸
早世次子槐能承家學年未弱冠遂掇芹香三子桓國
學生溫文爾雅孫男三均狀貌魁梧天資聰敏江君俱
以遠大期之辛酉粵匪擾婺闔邑剗辦團防公舉江君
爲東鄉團董警信逼近江君以母年邁預令人負母避

處山僻囑兒媳左右趨侍無曠定省而己以身任鉅艱
賊至其村凡家中房屋資財悉被焚掠俱若不與然者
語同袍曰賊勢孔熾不急圖之將如闔邑塗炭何於是
日夜運籌不辭勞瘁遂屢奏捷所是時亦與籌防始與
江君共晨夕見其踴躍從公如是而益以證前日所聞
者固確乎不虛也書云惟孝友于兄弟施於有政其江
君之謂乎使天假之年俾得致身青雲效用於世安知
不大有建樹耶無何年五十八歿所輓以柱帖云不辭
勞苦不畏強梁受怨因公業鏡剖心真可鑒盼兒飛騰
盼孫成立夙懷未遂泉臺望眼尙無窮嗚呼風雨如晦

故人不見謂之何哉

橫坑口

五十九世

永乾公傳

邑庠生

胡駿聲

十步之內豈無芳草十室之邑必有忠信地雖蕞爾而出類拔萃者自有人焉今乃得之於永乾江公公字坤元少以攻石爲業體無完衣饗餼亦難繼也拮据經營莫敢遑息又值饑饉之年薪桂食玉物力維艱加以二子婚教蓋不知幾費辛苦矣勤職儉用家漸小康而抱孫之願亦遂公獨不敢自逸惟豪飲好客客不時至供具毋少吝鄰里有貧乏者有所求無不副其意以去爭訟必力爲排解能使真者理伸枉者詞屈村中一切眾

務推公經理歷數十年秉公守正故一村婦孺咸推重焉生平臨財不苟見義必為立身行己諸大端雖讀書談道者不過是所謂十室必有忠信者其在斯人與

同治八年仲春月

橫坑口

五十九世

承孚公傳

教習知縣

黃

麟

紫封

公名發元字炳南生而穎異以家貧習為攻石之業事上孝撫下慈臨財廉取與義鄉曲爭訟必為排解有時需錢乃行者即傾囊弗惜樂善好施成人之美雖未必盈千累萬然充其力所能為亦足以見其存心之仁且所薄者厚即所厚者必益厚其平日所為孝友睦婣任

邨者皆於此可信夫奇節易顯而庸德不彰亦長逝者
之憾故爲之傳以遺其子若孫并以質世之有道者
同治己巳仲春月

謝坑五十九世濟文濟叟二公行狀

優貢汪煥其

濟文公狀

公諱濟文字煥然號蔚齋曾祖伯元公字天則祖萬玠
公字楚蘊父廷經公字揚言世有隱德揚言公創業武
林因家焉生公時祥光繞室稍長讀書能文章鄉先生
期以大器乃屢躋場屋又不忍以經商累老父遂輟讀
遵例捐貢生撫弟來遠極友愛經營江浙商務信義徧

遐邇而揚言公高枕故里矣然公每以親老途遙望雲興嘆遂歸無何揚言公病公親視湯藥數年如一日易簀時公年纔二十三捨地呼天哀毀瘠立致疾之由實基于此兼以獨任家政不忍累弟弟亦以兄軀弱不欲復相累一室之中雍雍穆穆人無間言黃公鳳翥贈額曰雲間雙鳳蓋兄友弟恭求諸今人往往難之也公雖無意進取而手不釋卷兼以濟人利物爲念鄉里事務羣相質成揚言公嘗輸義田六十畝周族中貧乏公克承父志時於村內未舉火者暗給錢米無力婚葬者助之橋梁道路祠宇寺觀傾圯者修之凡諸義舉知無不

爲方公之侍其尊人病也時覺榮衛未安三年喪畢鄉人察公容貌日益癯禱諸神有願代公死者卒年二十六遠近知公者莫不太息於天不假年而惜其才之未盡試也配沈孺人出浙江仁和縣名門淑女與公同庚公彌留時卽欲以身殉顧念衰姑稚子事畜需人守節撫孤已載邑乘今七旬有五矣子佐美字長民孫五巨莊巨荷巨蘩巨藻巨英今諸孫等以乃祖行述屬余余曰公之學其本在忍嗜欲苦筋力以勤家而養親而以其餘習六藝講世務以備當世之用蓋厚德而隱者也其他吾不知或知而爲鄉黨自好所能者不具焉

濟叟公狀

公諱濟叟字來遠號穎濱俊貢生幼負大志曉大義甫束髮從父兄歸自武林父諱廷經字揚言嘗施惠於江干及我邑之商於杭者父病隨兄問安視膳衣不解帶數寒暑年十六父卒慘切骨立而恐兄以哀毀泣諫兄諾之顧不能止公深以爲慮其平時之克相友愛可知黃公鳳翥贈額曰棠棣競秀蓋知之稔也越三年兄果病不起公枕股而哭一慟幾絕年未弱冠父兄繼殞中外惴懼而公卓然自立事生母柴孺人先意承志待孀嫂如母撫姪如子慨然曰男兒老死牖下不能繼述先

志使高堂缺甘旨子姪乏教誨雖侈言經濟何貴乎遂
席父兄遺業復趨武林億中多才業益隆盛構廣厦置
田畝已坐擁厚貲而性醅謹無驕奢自奉儉約如故公
先有嫡母汪孺人事之如所生年九十七沒所生一女
公視如親手足又念嫂氏苦節撫孤請旌則年例未符
因先琢坊石以俟之生平律己恕人慕義好客雖樵童
牧豎未嘗接以矜心而尊祖敬宗收族諸大節尤爲睠
睠謝坑舊有統宗祠與兄共宏大之乾隆丙戌修譜費
絀引以獨任其尊人輸義田六十畝濟貧乏公一仍其
舊後商業失敗不能應人之求又轉貸於人以給之貸

於公者負公公貨產代償由此家益落數益竒竟貧乏
以老嗚呼公可謂積而能散富而能貧者矣臨終子姪
乞遺言公曰吾何言生平無所憾惟儲石爲嫂立坊竟
因貧不果能繼吾志則賢子孫也公少時與其兄煥然
嘗從先祖道齋公受業又二姑丈遜齋公從弟也婚姻
世好故行誼得於見聞者可畧言其概公生於乾隆庚
午十一月十二日寅時歿於嘉慶甲子十二月初四日
丑時享年五十五歲娶王孺人能成公之志賢內助也
子五佩美儀美俶美侃美孫八人

附族議配饗議墨

乞卯按依原文有刪削

立議據承佑堂支眾茲因濟文濟叟二公兄弟孝友曾
於統宗祠塲石造墻並修整始祖墳塚是以公議擇吉
迎二公神主入祠遞年清明致祭另設專席配饗以勸
將來並按年頒豚肉十觔交其子孫收領日後族眾支
裔世世恪守永無翻悔立此議據四張各執存照

嘉慶十年三月立議據承佑堂支眾 華鏞 華烈

華鎮 維熊 廷志 廷明 廷尚 廷珍 其濟繹

濟蟬 濟源 濟裕 濟絃 濟政 濟成 起榮

震河 維燦 書余竟成

又本年七月輸骨租七十秤以作二公祭祀頒胙之費

另有議墨執據

附

六十世

佐美公配饗議

〔卯按〕就原據刪削

立合墨承佑堂衆等我宗祠創自明萬厯間先人極費艱辛厯今數百載綢繆修葺代有其人迨道光七年墻垣樑柱損壞大衆集議各房派人捐輸詎收捐多不交衆道光十三年閤族公舉佐美督理復行籌畫敷費鳩工並親赴各派募捐不避風雨二年告成以及文閣經理俱費心力族無以報議俟其身後迎公神主入祠附伊先祖父叔席次配饗並遞年頒胙肉三觔餅一對以垂久遠此係合族公議日後永無異說立此合墨存據

道光十九年二月立合墨承佑堂支眾華鑑 濟蒞

瑋美 維高 維焰 濟曙 濟蟬 濟螫 美保

麟美 呈美 綉美 璇美 芝美 巨葵 巨堯

謝坑六十一世巨瑗公事略

汪心田 族姪峯 青修正

巨瑗江君字近仁例授登仕佐郎向習木業篤誠端謹
為居停所信任積資置產咸豐末避亂家居杜門不預
外事治家儉約一絲一粟不肯浪費同治初公垂垂老
矣而平湖巨商以亂後木業全失欲圖恢復念非公不
可公雖年逾古稀尚稱矍鑠重聘延公至於再至於三
公亦以賓主義重難於固却一二年間諸事部署停當

商業亦漸復原再商諸東人薦賢自代旋里後以壽終
於家此可見公之品節德望有以取信於異地之人而
崇尙氣誼不惜勞瘁去來清白雖讀書談道之士無以
加茲惜乎不得大用僅見重於閩闈間也

白花

五十四世

廷龍公同子天鶴公傳

鄭景

公諱廷龍字雲從幼有大志長肆力墳典過目輒不忘
爲文下筆數千言翩翩有凌雲氣年未弱冠聲稱鵲起
就童子試郡縣拔前茅而見擯於院使者人皆爲公扼
腕公警然不屑意爲人雅飭循謹寬和而嚴毅敦善行
不怠里黨欽其才品競延致教其子弟多所成就脫穎

而後出者比比而公卒不遇晚遂棄舉子業日游心於詩
古文詞以自娛秋潭春圃杖履嘯歌蓋有古桑苧翁句
里先生遺風年八十五無疾而逝公一生積行嗜學恒
怏怏於己之不伸而懼詩書之澤遂泯也故教二子俱
讀書二子者次天召字元臣另有傳長天鶴字於九亦
積學能文士也少穎異稟承家訓能自刻苦偕其弟風
雨對床互相劇切冀以成厥考志其爲文組織經雅居
然登高古作者之堂鄉先達見者輒奇之謂廷龍公一生
磊落抑塞之氣可發舒於此子且至性過人內行純備
進規退矩事事趨步前代而稍恢張之識者愈於此卜

遠到焉而復數奇終鬱鬱不得志嘻兩世積行累學如此而不一顯於時倘所謂天道是耶非耶然公雖不遇而學成行尊年高德邵有東國人倫之望是亦足以慰先人之願矣奚必沾沾青紫爲卒年六十有四嗣二人長尙曷字煥如亦有道長者神情內朗動合古義爲鄉正數年排難解紛推誠布信尤好濟人之急扶人之危而未嘗詡詡有德色可謂克篤前烈者矣初艱於嗣週甲後連舉四子長者甫就塾稱英慧將三世積累之報不於身必於其子孫光遠有耀者其在斯乎

白花五十五世天智公傳

王三顧

公諱天智字明甫生於順治甲申卒於康熙丁酉享年
七十四少貧苦克自節損銖積寸累竟以起家然賦性
慷慨好行其德康熙丙申丁酉間連歲大祲鄉之席豐
履厚者數倍於公咸屬固莫肯一發公毅然軫恤之自
丙申二月至五月出米數百斛計日而施數口而咸貸
令自量半升而去一時傳頌號曰自不量復於丁酉二
月至五月設粥施飯繼行不倦猶誠飭兒曹食具必潔
以成吾志饑饉之餘死亡相繼公爲之買棺木給衣衾
以免暴露至建亭以憇商旅助產以給茶湯鐫之碑版
百世不磨公嘗訓其家曰子孫雖貧經書不可不讀迄

今或貢成均或游泮水書香不絕莫非公之餘慶云

又五十五世天召公傳

葉 諤

公諱天召字元臣號公爽世居涇東石門鄉之東村里
公生於康熙乙巳幼而岐嶷出語驚其長老早喪母從
其尊人廷龍公授句讀過目輒能成誦通曉大意里中
咸推爲偉器後試於有司輒不利虛緣葆真遂以詩書
世其家嘗曰開卷有益閉戶長吟歌聲出金石雖室無
擔石儲泊如也所尤難者公孀母早孀事之如母內外
無間言堂姪興少失怙恃零丁孤苦公撫之如子出爲
之完娶見人有善前推後輓且好生爲懷雖昆蟲草木

不忍傷有時買物放生又信奉袁了凡功過格嘗謂其
言雖與儒者異然吉凶慶殃自然之理故善非望報而
不可不爲既以律躬又嘗以訓其族黨以故鄉人莫不
奉若典型公考終六十有四子六人皆忠厚篤實孫曾
蔚起繼述書香公之餘慶蓋綿綿未艾云

又五十天揚公暨項太君合傳

姪孫夢彩

伯祖天揚公字君美號玉池幼失怙家無餘蓄曾祖妣
鄭孺人以紡績度日鄰有老婦死設齋醮普度者時值
夜半孺人方燃松脂佐紡經聞之泣然曰某氏得此普
度可以解罪冥世矣吾生且如此死不知作何狀伯祖

侍立瞿然曰母百年後兒亦當如此比時伯祖甫四五
齡耳閱十餘載而孺人卽世伯祖痛心疾首拮据無措
商之兄鸞借債數十金一如夙志嗚呼豈非至孝性成
鬱於中而形於外者耶其平時之竭力承順可知矣伯
祖每念熒熒孑立非精計然術無生活計因來往金陵
十數年適置紙數十擔屯儲下坊夢有人語曰金陵紙
價騰貴須速往始以爲夢語適然耳及至夜半夢寐中
如此聒耳者再伯祖乃僱舟裝載掉舟未里許回望儲
紙處已焚爲灰燼此其中或有默相之者耶伯祖少貧
未甚讀書而暮年暇逸時集親友及子姪輩談史事語

未終篇而是非得失了然雖讀書人無以遠過遇事能
裁決而豁達大度粥粥乎若無能焉者豈非神裕宿慧
歛然如不及者耶伯祖妣項孺人秉性和順少以貧苦
佐伯祖成家至豐豫後勤儉自持與婢僕同甘苦伯祖
享年八十有三伯祖妣七十有八同年卒彩自幼讀書
資既拙又苦善忘皇考尊三公輒舉以爲訓時耳熟焉
故詳也嗚呼伯祖妣旣克嫻內則而伯祖之艱難辛苦
至孝性成里黨猶稱之爲之後者忍默默已耶爰識諸
簡端以爲後世法云

又五十六世尚圍公傳

葉 諤

公諱尚圍字宮盛按江姓始祖由婺遷涇歷數十世至
公世居邑東鄉千秋里本素封其後中落公少時苦貧
不克展志詩書奉其父明甫公佐理家政勤儉敦樸重
然諾嚴取予既而生產日裕事繼母色養維謹人無間
言以故鄉人共舉爲族正遇事敢言與人無黨凜凜乎
有烈丈夫之風數十年通族無牙角鬻古稱王彥方陳
仲弓之徒庶幾近之公雖未親儒業而操行端慤訓子
義方皆暗與道合晚年子孫林立內外無期功之憂孫
聘侯蜚聲鬻序餘或貿易江湖或咏歌詩書昌熾殆未
可量公八十四歲考終元配張孺人亦賢淑偕老他如

卹鄰睦族存心利物等事尤不可勝紀云

又五十六世尙旭公傳

俞掄文

君諱尙旭太學生字以仁號暘谷同邑太平都人也惇
孝友重詩書中懷浩蕩每與朋輩處挹其丰采者皆若
飲醕醪靡弗愛慕有餘思焉邑侯賈公嘗見而奇之謂
君粹然有儒者風欲時加親近而君卒不履於其庭其
遺棄勢利遠權要人以爲有滅明之高致而才思磊落
嘗佐其父君美公闢新址增舊業而家道益昌父特竒
愛之廼年未五十沒父執其手哭之曰胡天不弔折我
右臂不覺聲爲之慟嗚呼以君之才使天假之年其經

營締造所就將不止是而能無悲哉配汪氏淑慎恭謹
孝舅姑睦妯娌內助之賢卓然可風卒年六十六子三
善琢庠生善璽監生善璋貢生

又五十六世尙耀公傳

趙青藜

星閣

公諱尙耀字尊三號一峯同邑太平都人室左氏亦同
邑人尙耀性好善有才幹先是其俗多悍尙耀諭以禮
義多化爲淳良居常訓其子曰口惠而實不至者固不
可爲卽實至而形之口者亦非真心爲善之人嘗創建
祠廟興文會又建茶亭於孔道治茶以濟行李之往來
歲以爲常至施棺修路諸義舉靡弗解囊恐後左氏性

慈和寡言笑事舅姑輒得歡心凡尙耀所爲多贊成焉
尤敬慕讀書有學行者或至其家塾旣款理之更令婢
僕微伺其子能否敬奉就正或稍忽俟客去必召其子
嚴責之族鄰有貧不能葬者捐奩貲代葬之性好佛施
於佛門者不一而足子二長夢祥太學生次夢彩郡學
生能文尙耀享年七十有六左氏七十有四同年卒
贊曰吾常讀柳文以麤梁稻被統穀獨粹然憐天下之
窮眡謂積於中得於誠往而復成其在內者也尙耀家
素封而修德刑家好施不倦閨中令範卓然著稱謂非
積於中得於誠者歟抑吾聞尙耀舊居湫隘或勸之營

室時祠廟未建作色曰祖靈未有甯居先營私室余不忍也是其學有本末宜其制行之不可及矣

又五十六世尙瑞公傳

胡青芝

公諱尙瑞字文源明甫公次子也其行誼著於一鄉而大者尤在首建宗祠江氏由婺遷涇歷數十世人丁蕃衍漸不相識而春秋禴祀之典曠焉不舉非有家廟以統攝之則孝享於何而展子姓於何而合公於乾隆甲子之歲首創義舉捐囊資助巨木竭力糾督聿觀厥成祠旁復立義學經營措置皆身董其役至於篤同氣慎交遊隆禮師儒軫念單寒應事之暇卽親詩書義方之

訓無間門內懿行蓋不可悉數公考終六十有二其子
孫衣冠濟楚克振家聲云

又五十六世尙雙公妻洪孺人傳

胡承璧

培峯

孺人洪公會生女也生康熙戊辰年十六適江公尙雙
公性耿介孺人淑慎温恭生一女在襁褓中計于歸未
及三載公染疾百藥罔效夙夜祈禱請以身代而公竟
赴修文之召孺人揮涕拜別舅姑遂絕粒誓不獨生宗
族請紹尙圍公次子善汝爲嗣勸諭再四乃泣血言曰
死節易撫孤難吾甯爲江氏一門計者強起哀毀骨立
尤惓惓於孝親撫孤聞堂上哀慟聲輒多方慰藉繼娶

姑戴氏與孺人居二十餘歲事之愈謹人無間言其於
嗣子訓以義方嗣子亦醅謹居鄉多厚德不幸子又棄
世孺人終爲之撫孫成立壽七十有六一夕召諸孫言
曰人不常存惟德足馨語畢端肅而逝 贊曰松心兼
柏操閨闈有完人孝義從茲盡芳名播四鄰

又五十七世善法公傳

胡承譜

江君諱善法字君度邑之東鄉人蓋孝友仁慈敦禮守
義人也江故著姓君爲宮盛公長子性恬淡寡言笑兩
尊人春秋鼎盛時君依依膝下率仲弟奉甘旨慈孝友
愛人無間言江氏之先自婺徙吾邑繩繩振振一族數

千人君謂支派盛恐序次淆慨然以敬宗收族爲己任爰創立宗祠俾歲時烝嘗有所觀感經始於乾隆甲子四月落成於己巳九月又念子姓既蕃秀頽禰出按周官家塾黨庠術序國學四者皆自鄉推而放之以達於邦畿故旣立祠宇以妥祖禰不可無義學以培子孫乃復庀梓度木十餘月告竣於今瞻采桷之高麗猶想見君之精勤也君作事有矩矱必度其力之可爲而後任旣事無矜容無喜色恂恂若愚而宗族鄉黨卒莫不交譽之是其得於性而施於身動與天合固素所樹立然也君生於康熙癸酉七月十三子時卒於乾隆己卯七

月初十亥時享年六十七配吳氏子二長承珍邑庠生
次承瑁孫三人宗遐宗麒宗譜曾孫二人兆慶兆疇
贊曰昔程明道先生以管攝人心睦宗族厚風俗使人
不忘本爲教君其聞而知之者耶君未嘗株守章句卒
能敦尙古義見諸實踐若是彼浮薄騷敝之士日誦前
言往行而操戈同室骨肉仇讐者能無思及面赤否也

又五十七世善琢公妻葉氏傳

趙青藜

星蘭

江節婦姓葉氏同里故諸生善琢之妻也年及笄歸善
琢孀姑在堂節婦事姑謹生子曰振華而善琢亡節婦
誓不欲生屢死而甦旣念姑老子幼乃勉進飲食理家

政終姑之天年撫子成立爲縣諸生節婦守志凡三十年先是夫歿姑卧病六載節婦奉養衣不解帶藥必親嘗復割股和藥以進而姑病愈人皆謂孝感云乾隆三十年旌如例建坊於邑東鄉之二節水

贊曰婦人從一而終天地之常經也至以婦代子職母代父職而各盡其道使其家世復振功亦偉矣然則善琢之死可以無憾矣至割股奇行聖賢不以爲訓所以酌義禮之中也顧後世讀書君子有至性過人而獨行其是者况婦人乎

附涇縣知縣李元標古風一首

天地有正氣不必在鬚眉或爲忠與孝或以節義維邑
中有貞婦淑質嫻閨儀佐夫勤苦讀事姑謹卮匱夫死
誓欲死旬日絕餼糜旣念姑已老復憐黃口兒以養亦
以撫此責貽阿誰侍姑病六載日夕勿稍離藥餌不得
效和扁不可爲刲股隨以愈茲理亦大奇撫子旣成立
早歲馨泮池冰霜三十載茶苦甘若飴子復生子五天
報已無私 聖朝重節孝遍訪及山隴我來涖此土務
在敦民藝奉請建坊牌崛起水之涯闡微發幽光珥筆
曷所辭與以鐫枉石芳聲布道達

又質存公妻后氏傳

鞏青按疑卽五十七世善達妻

山東道監

趙青藜

星閣

節婦姓后氏邑東鄉江處士質存之元配也于歸時其
舅前卒事孀姑吳氏有禮生三子年未三十而質存卒
哀號慟絕誓相從地下隣婦勸慰堅不聽姑泣諭之曰
吾老矣死何足恤此熒熒三孤將安託婦瞿然節哀不
復言死諸子皆幼姑復年衰多病家貧室無長物賴婦
日勤刺繡夜事紡績奉甘旨以終姑天年撫弱息各成
立里人思爲上其狀婦曰此吾分也何敢煩諸長者以
是愈相敬服云

贊曰婦不幸失所天而能苦節以終其身難矣至家貧
而上待以養下待以撫抑又難矣記有云信婦德也一

與之齊終身不改循不改之義則知畏其難而易其所
守者皆失其本者也書曰表厥宅里樹之風聲今節婦
雖執謙退鄰里其能已於請乎或曰以成婦志是亦猶
行古之道歟

又六十世兆美公紀實

太平府教授

洪振遠

公字仁齋我鄉盛德君子也生有至性家貧少孤事母
孝十齡時見母胡孺人以紡績度日泣然曰有親弗能
養非人也遂牽車遠遊爲養親計歲必返里以慰慈望
伯仲間友愛備至其營業所獲除事畜外積累成家居
家嚴整有法接物一本於誠鄉里有爭競者必委曲排

解務使兩相輯睦而後已遇貧乏不自存者必多方設法以求其濟救荒卹患一切善舉無不踴躍爭先而出之以肫摯無矜容無德色故鄉黨宗族稱道弗衰平居教子弟嘗曰為人須知敦孝弟睦宗族和鄉里貿遷雖亦治生之道而欲管攝心地造就品詣則非讀書不為功嗚呼此可知公之用心矣公少貧黻讀晚歲時聚親友子弟與談史傳語未終篇其是非得失即了然於中遇事能援以裁決而虛懷善下又似粥粥無能者然配胡氏賢淑性成艱苦中能佐夫成大業繼配殷氏克嫻閩訓子瀛郡學附生孫孝荃孝薌孝芬按例生不立傳

因特爲紀之以俟後之修家乘者 同治乙巳春

長田金竹門

十七世

陽英公傳

以下從長田譜錄入

張圖南

公諱陽英字德傑伏生公三子也幼習舉子業聰明穎悟援筆成文事父母繼母俱能得其歡心年十七入黌庠愈下帷攻苦二十九歲登賢書由舉人出任井陘縣令善撫字民有召父杜母之歌升南雄府分府清聲益著後致政歸依然儒素也語云愛敬盡於事親而德教加於百姓其公之謂歟公昆季四人長曰陽春字德澤才優學篤齒德並尊次日陽恕字德容老成持重四曰陽輝字德光淳厚質樸夫人胡氏有賢德子四孫十一

曾孫十八元孫二十七振振繩繩人咸謂公之碩德所致云 乾隆甲申季冬

敘樂門二十一世嘉賓公行述

元孫 應蛟

國有勲德史氏必標其名祖有懿行子孫當表其實我祖嘉賓公質行載入邑誌然語焉未詳不若家庭之耳熟爲更悉也蛟幼失怙日侍先大父側受前言往行之訓一日呼蛟語之曰子來前吾以高祖之行告汝高祖字我有天資敏捷少習詩書入目輒終身了然不遺一字年弱冠補博士弟子員厥後九試棘闈副座主閱其文劇賞之以魁首薦而正主考別有所屬意抑爲亞元

以是柄鑿副主終不忍枉其才姑置副車謂留以有待
使他年復可奪解不幸天不假年遂賫志以歿藝林咸
惜之高祖爲人兩眸炯炯其光如炬每覽人文字可決
人成敗休咎若燭照數計嘗設帳理源教澤丕著太常
寺卿余君一龍其高弟也又能啟迪後人燕貽式穀故
曾大父與伯父輩咸蜚聲庠序家學淵源有自來矣汝
幸克繩祖武勿墜家聲蛟時尙垂髫聞之唯唯及今三
十餘年青燈黃卷思繼述前人尙未可得而前人志事
又任其湮沒不傳罪滋甚矣因卽曩所聞于先大父者
記憶而筆述之以待後之表彰焉
乾隆乙酉正月

敘倫門二十一世宗瑚公傳

元孫

時鉉

宗瑚公字炳文號玉友鉉高祖也天質粹美喜樸惡華
崇讓賤爭慎動謹法少家貧事親孝事三兄盡恭後三
兄早世高祖任家政無所飲助獨發憤自雄不辭拮据
不數歲而家道寢興而布衣糲食終身不厭不侮鰥寡
賙人之急或有爭訟必力爲排解雖費己財不顧故高
祖在日父兄宗族稱其孝友州閭鄉黨稱其仁義邑侯
聞之延入賓筵賜額錫爵褒異之以風示一邑鉉聞聖
王之制爲鄉飲酒禮者所以彰有德風衆庶而美教化
也三代之時其禮最重而與是典者必其人卓異於眾

足以廉頑立懦磨礪乎一時逮乎後世沿爲故事名是實非若高祖之素所樹立非當之而無愧者乎李氏習之曰爲人子孫祖有善不知不智知而不傳不仁鉉懼高祖之德湮沒而不彰也故不揣固陋述而志之以俟後之採風者 乾隆乙酉春

種德門二十三世汝元公傳

余斯颺

大賓先生卒三十餘年鄉里及行道人皆思之不置嘖嘖頌曰先生慕義樂施寬厚長者也其長子明經君梓聲嘗備書其事行請余傳之余故善梓聲而習先生之爲人甚詳髮燥已熟其名髮短始稔其實乃爲大賓先

生傳先生諱汝元字以亨婺之長田人江固望姓其先
景房侍御以來代有聞人父諱朝銘有隱行生五子先
生行四年十二母見背服闋年餘父又見背父易簀時
垂慮子幼目不瞑先生泣拜床下曰不肖年十六矣弟
雖幼匪異人任大人可無慮乃目瞑家故貧并遺積逋
時兄弟析箸三兄已有中饋先生未室獨挾季自爨日
惟樵採作活或語之曰而父表表而子顧屑此耶先生
曰朱翁子負薪行歌卒爲名宦食貧腰斧何勿屑也戚
里憫其窮或有餽遺辭不受居二年積白鏹一鍰族知
其安貧自立且撫愛弱弟輸貲貸之勸其棄樵就商乃

傍兄舟走饒小販三年後綽有黃姑聘錢乃娶謝氏年
十四少先生八歲勤儉貞淑有婦德明經君其所出也
先生既得賢配乃壹志經營家業隆起於是奉子母償
族所貸并清父逋人以先生可與通財爭出貲助之年
三十二伯兄歿子幼貲饒孀孤無倚遂代爲支持人莫
敢覬迨諸姪成人乃籍財產均授之靡毛髮私季長不
能娶代爲納室生四子子長又不能娶又代爲納婦割
產分金始終勿替蓋不忘父瞑目時之遺慮也性喜施
常以持滿爲戒歲丁亥戎馬充斥又大祲乃與謝氏謀
歲歉人饑道多積殍吾欲毀家紓之謝謂此甚義舉但

微資末由廣賑不如貴買賤賣爲得乃倒橐往休市米
歸則抑值以糶鄉閭賴有起色又念高奢爲七省通衢
每遇大水舟子苛索渡錢人多病涉先生惻然爲設義
渡時洪水正發舟不直放而行人趣程爭渡隔岸搖手
止之勿顧又疾聲呼止之弗聞乃仰天嘆曰渡本濟人
今反傷人矣先生素習水善游乃欲剗過彼岸止其放
卒爲巨浪蓋入水中氣不得息私忖我欲救人而生之
天豈欲溺我而死之乎忽覺足底有如拳扶起之者爭
渡人見怒濤洶湧中出險入險狀亦停舟駭望俱得免
於是賣舟造橋長資利涉瀕河建佛菴復輸常稔田一

十六畝爲茶亭長生湯茗之費常欲創首募建石梁以爲永遠濟渡計不期甲寅燹後貲產消耗尋遘疾不起彌留時顧諸子嘆曰吾欲造梁未就已矣若曹勉之比時次子德功獨唯任其責先生歿後至甲子年倡建石梁延訪高僧寂祥募緣十方善信不五年而石梁成而先生之志遂矣嘗往郡見路傍屍暴露立買棺瘞之里有用假銀於先生者先生不知轉用於客客忿然叱怒先生隱忍如數換給然後將假銀還里人客改顏謝過蓋先指其人恐客欲與理論故隱忍受叱也里有橫逆相加者理遣而情恕之年五十族衆奉爲鄉約斷斷爭

鬪者片言立解自是庭訟勾攝竟不聞其族之姓字僉
謂得先生數人則頽風澆俗可化爲無懷葛天矣至素
有仇隙者倘遇難必秉公維持之並不乘危雪私以爲
快道有遺物必出帖訪還不得其人則以遺物充修路
費有河客賣稻誤多發數石尋計備兌還不敢妄取親
戚交遊不能完嫁娶者貧乏不能自存者急難不能猝
辦者皆取諸先生不逆計其人能償與否也嘗庭詔其
子曰甯人負我毋我負人天之報施銖兩悉稱不爽也
年六十邑侯劉公舉爲鄉大賓其申文云鄉邦碩望月
旦隆推教子樹幟於宮墻廸躬著型於鄉黨知言哉續

娶盛氏復生三子享年六十七德功乃盛氏所出先生
次子能繼志述事追思先生遺囑乃倡建高奢石梁經
營五年德功非惟盡子責慰父願平生亦好施放生韋
菴氏曰人有厚德而才不副不獲自致通貴天必爲之
才其子孫以顯榮光大之又或爲善之志未遂天必賢
其子孫以繼述成就之如一橋也蔡興洛宗造陽以成
母願江梓聲德功倡造高奢以承父願其事等耳顧興
宗曾掇巍魁躋要秩梓聲負江左才名僅得蚤膺歲薦
德功隱居泉石立品制行教子成名已見蜚聲黌序吾
知天之酬報先生其子孫顯榮而光大者正未有艾也

康熙戊子夏

世德門二十三世起旺公傳

黃恩

夫立德立功立言三者俱不朽巖穴修潔之士未操尺寸之柄勒鼎銘鐘無與焉然惟孝友于兄弟是亦爲政苟有德有言足垂來茲而功亦可概矣若鄉介賓國興江公者生而淳篤昆玉五行居季父母最鍾愛之公事父母能竭力處兄弟有至性家庭內外怡怡和樂至析箸相讓急難相赴猶其迹也其訓他人子弟亦無不以孝友爲先是公之德公之言也壯年家徙四壁坐賈謀生雖三尺之童不欺塵舍遷徙無定交易者必爭覓之

至今尙嘖嘖人口生平喜讀書重師儒其詞文章詞賦
推重同輩惜命舛未售性豪爽善解紛凡鼠牙雀角鄉
閭所不能調和者藉公片言冰釋非以德服人能如是
耶見貧苦顛連者必量力賙卹雖自處不甚贏餘而心
晏如也孝友於家任卹於外卽未立功亦堪不朽矣鄉
推祭酒重以賓筵蘭桂盈庭厥後昌熾年享中壽未疾
而終豈非天之所以篤潛德乎 嘉慶十三年夏

世德門

二十三世

起積公傳

知婺源縣事

蔣國祚

吳揚稱各地徽婺號文邦余嘗心嚮往之幸承乏婺邑
心竊喜焉簿書之暇晉接婺人士乃得江生應熊吳生

世語之翰皆品卓才高婺之名士也每閱三生文字未嘗不三復贊嘆之三生曰公未得生友江子嵐溪其人

也如得之生等當退避矣詢之爲江生族叔名起積字琳笏號嵐溪其爲人也詩李杜字鍾王文班馬學韓柳然澹泊性成不求合於世予強江生致聘館於宦邸抵掌而談真名下無虛士也余嘗勸就仕嵐溪每哂而置之爲西賓三載一日因疾辭余余莫之能挽也因得交之顛末故爲傳之一以表余嚮徃文邦得士之心一以不湮沒嵐溪之爲人江吳三生其亦不以余言爲空談矣

雍正戊申蒲月

種德門

二十世

應枋公傳

內閣中書

王恩注

世泉

公諱應枋字德功號東巖原居長田大塢隨父汝元公
遷清華雙河雙河固通衢也其東有高奢橋川廣浙閩
往來不絕公父慷慨有大志捐租構亭燒茶設橋造舟
以濟行人然猶以爲非永久計也寢疾時死而復甦者
三公跪撫曰其爲未卒事於亭橋乎父苟不天當竭蹶
以完父志須臾乃瞑後加輸田於茶亭行道之人無病
渴者又輸銀千兩倡首造橋禮曰孝子事親非終父母
之身終其身者公之謂已居常足跡不出鄉閭身不求
聞達天懷孺慕定省必親父病不解衣而躬湯藥者逾

月而又友于誼篤猶子之婚教必周仁愛恩推悅口以
芻豢爲戒遇歲荒則貴糴賤糶見貧乏亦好善樂施是
誠近今所罕觀者適邑侯趙公創修志乘急以聞諸當
事夫古人君之問鄉長也曰於子之鄉有慈於父母發
聞於鄉里者則以告惜乎是典曠不舉也公去世已遠
深仁厚澤昭匕在人耳目卒未有道其一二傳於當途
而若存若滅以迄於茲今旣耳熟能詳忍聽其湮沒乎
哉 嘉慶戊辰夏

忠德門二十四世爾炳公傳

知四川雅
安縣事黃嶰谷 浮梁人

公諱爾炳字美勝二歲失怙依叔父處年七歲牧傭於

浮之南稍長偕兄國英來居馬家灘自食其力幸確業
可藉家道大興由是受室卜築與兄析箸又積而能散
凡有義舉公與吳孺人必相勸以成其事嘗歲杪歸籍
道經梅山宿旅邸聞鄰人吳周保家啼號欲售妻償逋
次早返家告貸三十餘金代全家室今其夫婦子孫咸
德之又往來汝坑塢憇於茶亭憫其湯茗資不足捐田
一畝半割稅助之并給棺於守亭者公於婺之長田爲
忠德門其支祖壯文公以下無家廟惆悵久之適有議
及營建者遂捐銀五十兩鳩工庀材皆預爲籌畫吳孺
人舊歲六秩同邑汪薌林侍御額曰懿德閑家公子三

人其中子柏林蜚聲太學諸孫習舉子業行見家聲丕
振於以報公之潛德與孺人之賢能也是則余爲立傳
之意也夫 嘉慶十三年桐月

世德門二十世貽謚公傳

胡炳照

古今人所推重者德與壽耳勝翁江先生家傳清白三
歲失怙母王孺人矢志撫孤成立先生性仁厚篤於親
友于兄弟常以不及事父爲恨念母劬勞晨昏奉養必
以誠居母喪哀毀踰禮祭葬一循家訓而孺慕之忱終
身不失每當兩尊人週忌輒悲不自禁淚數行下所謂
永言孝思非耶至於勤儉成家謙和接物嘆伯兄之早

逝代立嗣以承祧舉凡排難解紛睦婣任恤之事直如
王烈居家而鄉閭欽德焉夫本固者枝茂積厚者流光
先生德備厥躬宜其上膺天眷偕淑配俞孺人舉案齊
眉吟白頭而愈歡鏡黃髮而相樂 恩綸三沐錫 爵
加榮年踰九十無疾而終斯非碩德延齡之驗歟 嘉
慶戊辰秋

世德門

二十
四世

貽讚公配胡節婦傳

進士

齊

翀

羽峯

節婦清華江貽讚妻也年十七歸貽讚未逾年而貽讚
歿節婦以死自誓翁姑謂曰貽讚之不幸天也若有孕
苟生男是貽讚後也江氏宗祏係焉且余兩人老矣若

死讚之後其奚望乎彌月生男節婦因竭力撫其子以
爲貽讚雖死猶生也然而貽讚家甚貧朝夕饗飧無所
藉節婦躬自操作上養翁姑下哺其子艱難辛苦不可
言狀今年五十餘矣猶操作不衰又常割股療其姑疾
事載邑乘讚羽峯子曰節婦余內子從兄弟也內子嘗
爲予言節婦父文學鵬藩公年老而節婦之母死弟幼
家貧無以供衣食如江氏家節婦乳哺其弟一如其子
兼助其父如養其翁姑而其所爲資皆辛苦女紅躬自
操作所致然則節婦誠賢矣哉

乾隆乙酉春

敘樂門二十五世佑生公傳

舉人

余煌

翁諱佑生字志萬鵬飛其號也翁敦厚宅心然諾不苟一切因應不存芥蒂初家窘水口社礮傾圮行者咨嗟翁有志復修越二十餘年家業振興果完此志又嘗修道路瘞暴屍排解爭訟商景鎮時行經東萊亭遇有遺囊開視得銀一封翁念此人回覓不得恐喪志俟之日暮更俟之明日還之不受謝亦不以告人今年近大耋援例授登仕郎家業隆起布衣糲食不改其初學使萬額曰質行可嘉郡縣誌亦採入質行德配何孺人梁案相莊舉丈夫子三俱太學生諸孫濟濟卓犖不羣蓋方興未艾也嘉慶丁卯冬

叙樂門二十五世元春公傳

族人得秀

公又名彬大塢人遷高奢生而沉靜縝密不好弄不喜
紛華遊宴偕妻汪氏以灌園治產為務鄉黨間誠信相
與不稍雜以機變子三人皆敦龐淳厚年九十有三兩
沐皇恩 欽賜壽官非沉靜縝密能享此高年膺
寵錫哉 嘉慶戊辰夏

種德門二十世德煇公傳

靈州知州 蕙 恩

公諱德煇字良玉號崑山處士應枋公三子也天質粹
美不喜浮華崇讓賤爭循循矩矱年舞勺家道寢興與
兄邑庠生德炆從師講貫雅耽經籍聲震文壇自父即

世不得已棄學撐持家政俾兄得以篤志芸窻經營拮
据刻無安晷而且粗糲自甘事父母則左右就養持躬
嚴正事兄長則和氣相迎殆古所稱愛其親不侮於人
敬其兄不慢於人者至於處鄉黨待知交從無崕岸以
故德行著家庭口碑流閭里福澤及子孫而壽而康終
其身無禍患德配俞孺人亦賢淑嗣君象賢孫枝蕃衍
謂非盛德之所致歟 嘉慶戊辰夏

敘樂門

二十五

紅祖公行狀

再姪

雲舉

公諱紅祖字乃繩號松遠行四處士華山公子也雅耽
經籍沉靜詳慎爲長田人望其先彥遐公聞著濟陽高

祖嘉賓舉孝廉爲郡侯吳公所推重經明行修誌載不
朽曾祖之楠以文藝精通補博士弟子員祖穎斗少有
逸才日誦數萬言輒終身能默識黌宮食餼聲噪文壇
公生而淳樸寡言語父母鍾愛之常語人曰此吾家蠟
鳳子也數歲偕羣兒嬉遊登大阜見蟻垤羣兒爭投土
石公瞿然曰彼無害於人何忍傷其生凡生平所爲能
充其無欲害之心以執其微而守其雌者蓋天性然矣
稍長就傅重厚簡默淡然寡營塾師謂其有冉仲子之
風因以啟行篤實之語爲公策勵公雖博學多才而不
營情於好爵者良有由也公之事父母也小心謹慎常

得歡心事兄長則抑然善下至白首無間言鄰有謀公
祖山者初肆其狂狡終轉為和睦公之光風霽月有以
致之況物剛則折局寬乃圓其所訓戒子弟者尤為不
刊之論德配俞氏有淑行子以信敦厚寬裕女一適戴
時亨孫男二孫女一曾孫女一公康熙壬戌十月十六
日酉時生乾隆戊寅四月二十二日子時歿享年七十
有七 乾隆戊寅夏

古槐門

二十
五世

能武公傳

甥

張圖南

翁諱能武字承烈不顯其號也會祖少喬公賓興側席
叔祖鳳池公職列春官祖明公由長田遷清華雙河父

伯魁公克守先緒翁年十四巖父見背孤孀子立時有
宵小媒孽其父塋者翁孤身鳴冤郡縣父骸得安又有
大憝謀其祖塚合族驚惶無措翁毅然曰所貴乎子孫
者謂宗祖坵墓克全無患也今一抔之土莫保安用子
孫爲遂奮不顧身獨力抵排經年始得直固其孝思激
發才畧有大過人者然居平敦遜謹厚接上御下然諾
不苟恂恂然無疾言遽色內外咸稱長者中年家道日
隆自奉簡素而推解不吝不喜虛聲諛聞甲子冬余祇
謁德門欲以賓筵薦翁曰人生天地間上之德不揚於
奕世下之功不出於閭巷而勉強塗飾耳目以爲榮辱

孰甚焉甥其無貽吾辱翁之崇實黜華類如此原娶汪氏不祿繼配吳孺人余母娣也克全婦道善事姑其姑俞太孺人晚喜齋戒孺人左右就養數十年如一日每值姑齋期不敢異食姑歿亦如之竟以終身焉其他淺淺細行未能殫述嗣君二孫十人曾孫 人所謂植本固者枝必茂歟余屢奉慈命候起居孺人撫愛彌至於手足之情常繾綣不能已今翁與孺人往矣畧述梗概垂諸家乘不敢溢美云 乾隆甲申嘉平月

世德門_{二十}孔庚公傳_{五世}

王應瑜_{魚峯}

翁諱孔庚字素生號砥中畧年穎敏讀書能通大意及

長潛心性理熟精諸儒語類立身行己具有法度常慕
薛文清爲人謂直接朱子之傳讀書錄與遺書相發明
非元明道學家所及其持論類如此性孝友弟早歿爲
立繼嗣訓之成立絕意聲色淡約自甘中年喪妻遂架
一小樓隻身獨處意泊如也精舉子業中繩墨恥以詭
遇爲工試有司輒不利然卒無愠色年九十以處士終
子四人孫五人曾孫濟濟乙酉余在告其孫鳳書館於
余爲童子師熟聞翁之崕略故撫其顛末而系之傳
論曰吾邑爲東南鄒魯紫陽遺澤未湮至今猶有聞其
風而起者或謂豐於德嗇於遇不免以是爲翁芥蒂則

六一居士何以有一行之傳也詩曰鼓鐘於宮聲聞於外名實之不相掩翁其知之矣 乾隆乙酉春

忠德門二十世虞書公傳

胡際清理卿

翁諱虞書字柏林予四弟岳也於予爲父執翁自降尊交予每呼予語或攜至其家竟談終日故翁性情行事予得記憶翁少孤兄弟三人翁居次才能獨出父爾炳公向家浮東馬家灘有田百畝頗稱饒裕父歿後長兄虞賓不克自振家漸落田存無幾翁年稍長謂母曰家破如此弟尙沖年將何爲計因日夜營謀不自知其勞苦奈事與心違賈於樂邑資斧喪盡歸又屋燬翁慰母

曰毋憂也此天之玉兒於成也未幾果創業造新居置
田疇父子兄弟四列成均又爲亡姪立繼嗣恢大祖先
祠宇倡興祭祀建立祖墳石碑造五十里洋湖之路則
六載忘勞輸十八灘茶舍之租則萬人沾潤翁曾無德
色惟率直性與世往來凡其所言所行從不知囁嚅隱
瞞爲何似故愛而交之者多畏而避之者亦不少其尤
有難者某負翁重逋翁鄰不追猶解囊代釋他欠其餘
濟貧恤孤更難盡述今翁歿四年矣興懷曩昔呼予對
語時豪氣厲聲宛在耳目而辛苦艱難生有益於人死
足對乎祖者猶令吾長夜青燈感慨係之茲其孫相望

相勲因修宗譜乞傳余故據實如右

道光甲辰冬

古槐門

二十
六世

廷煒公行狀

杭州東防同知

張圖南

公官諱國光字彤有號南溪生而岐嶷甫就傅卽潛心
向學嗣以昆季析箸撐持家政遂輟業習計然術家業
隆起居常言行交際具有法度母氏長齋繡佛公苦口
幾諫者至再不聽則亦貶損飲食順母意又篤於宗盟
倡修族譜精岐黃術活人無算教子義方訓以澹朴諸
孫肄舉子業者應大小試必鼓勵其行卽或不得意以
歸必慰之而鞭策其後鄰有困乏鬻婦者公袖金贈之
使完聚更有負債而不責償者成人之美周人之急不

一而足公年七十三由太學與賓筵某廣文贈額曰德
著鄉閭 四朝盛世兩沐 皇恩歿於嘉慶戊午之春
距生於康熙己亥享壽八十歲配胡孺人善事姑能持
家壽八十九歲公親見子五人孫十三人曾孫六人
嘉慶三年四月

種德門

二十世

培連公行狀

經魁

余

煌

公諱培連官卍南春字華美一棧其號也姓江氏原居
長田大塢前明遷清華雙河代有聞人至良玉翁卽公
考也負販經營年三十六始生公維時環堵蕭然賴太
孺人女紅所入佐饗殮公至孝性成稍長卽事樵蘇十

齡後不忍太翁獨勞遂同負戴於休婺之間嗣又獨傭
於江右者八年慨念太翁年近古稀不敢遠離因服賈
於本里乾隆乙亥太翁棄世公哀毀逾禮祭墓之事若
忘其家之貧者年五十仍懋遷江右家道亦漸裕歲丁
酉太孺人歿葬祭盡禮一如居太翁喪蓋天性厚也生
平立志不苟見義必爲凡有陰德不令人知乾隆乙亥
祖祠遭燬艱於創建公殫力重新之高奢種德橋爲七
省通衢公之祖應枋公倡首甃石詳載邑志乾隆戊申
壬子兩被蛟水冲塌公勉承先志前後首事勸捐重建
至今行人賴之其他善行多類此公性行醅篤鄰里困

乏必周與人交然諾不苟歲庚戌公年七十一援例

授登仕郎恭逢上皇萬壽覃恩賜廩帛丙辰年七

十七復遇嗣皇御極恩授九品壽官前督學戴公

贈額曰義行可風公生於康熙庚子十一月十八辰時

歿於嘉慶辛酉六月十一子時享年八十有二配胡孺

人有賢德子二女二孫男四孫女四並親見曾孫男一

曾孫女二嘉慶辛酉冬

敘樂門二十廷喜公傳贊六世

戴訪逵

太學江翁諱廷喜字仰端號敬三幼處窘年未弱冠即

棄詩書隨父營生計於饒之景德殫精畢慮家業隆七

起乃增田園新厦屋在浮梁則多置磁碓稱小康景德
夙建六邑會館瘞埋施棺惜字義渡等事翁皆量力捐
輸本里高奢種德橋傾圯衆舉翁作領袖捐資督工不
憚勞瘁雙親壽八十餘甚矍鑠翁事之孝謹親歿皓首
居喪哀毀踰禮更推孝思而友昆季怡乚無閒言析箸
時競相推讓治家井井有條生平究心青鳥家言近祖
未葬必覓宅兆遠祖邱隴有荆棘堙沒者立碑識之或
牛羊踐踏者砌石修之外家無人棺厝淺土翁爲營葬
歲時祭掃必躬臨之其購買山塋也若少礙他家祖地
雖吉壤亦輕棄德配韓孺人有淑行子二孫二歿於道

光辛丑壽六十九

叙樂門二十世廷河公傳

胡廷玉

公名麟書字聖瑞號禹勲世居婺北長田父登仕郎佑
生公生三子公其季也公由國子生授貢生娶李氏甲
椿邑庠生承鑑公女舉子相鏞相鏐相鈞鏞國子生鏐
登仕郎鈞業儒孫達德達尊達材達標達楫公乾隆甲
午生道光甲午卒壽六十一督學鄧贈額曰德厚流光
同族石生明府之紀贈額曰行著倫常公生有至性少
時讀書家塾念兄廷新公久勞於外每食輒不安年十
八棄儒就商客遊新平新平故舟車輻輳地客商邪僻

狎暱遊戲酒食徃上用財如糞土公是時年未及冠卓
犖自好不染惡習雖尊人家風樸素庭訓森嚴亦公德
性固堅定也以故家日隆起益恢先緒公爲安先靈研
形家理遠近山水走歷幾徧雖酷暑沍寒罔憚與人交
重然諾足跡所到靡不欽重尤篤於親凡昆弟子及
族中不給者多公是賴至修橋梁葺道路恤孤寡慨然
輸金無少吝公沒之十有一年族修宗譜其季子請傳
於予不敢辭也於是乎書
道光甲辰九月

世德門

二十
六世

廷億公傳

胡廷玉

公官諱翔雲字允孚號金園

贈儒林郎諱永松公次

子也先世由長田徙居清華幼窘甚傭力自給比長隨
父江右諸艱備歷越數年父歿兄弟四皆星散公招集
與同黽勉家日隆起由是新堂構置田園兄弟俱入國
學公更以儒林郎得 勲封父母祖父母公爲人踈財
仗義凡周貧恤故濟饑等事不具舉遇公事毅然勇爲
樂匪河梗爲合邑民食病偕往訟理必河通乃已里下
市神廟頽壤協力鳩造逾年始工竣里有六圖十排會
獨力司理凡十餘載同會人多其功公沒爲設祭以報
公御家最嚴子姪諸婦凜然莫敢犯又喜客廣交禮重
儒士每過謁欵洽盡歡雖晚年生計稍絀卒不變配時

氏以公貴 封安人生子三長早卒次國子生孫六皆
業儒曾孫一以乾隆癸未生道光庚子歿壽七十八
道光庚子仲冬月

古槐門

二十
七世

健龍公行狀

子

得秀

府君學名雲舉字霖萬號霽齋居清華雙河爲人嚴氣
正性履潔懷清家法整肅儉約與人和易惟家故清貧
鄉里諸義舉力不能助而心常歉然始先大父平齋公
四歲而孤賴曾大母張孺人撫育成立未入塾多受人
侮比得府君慤慤課讀數歲卽令入學十歲令負笈就
外傅家雖窘而延師必隆禮意有在也府君亦天資穎

異潛心向學婺名宿皆器重之弱冠後補博士弟子員
益下帷攻苦三戰棘闈未售而壯志要未墮也嗣與叔
父析箸大母繼逝哀毀之餘祭葬以禮時物力維艱加
之不肖五人衣食婚教皆府君經畫有不給則稱貸以
益之因是夙夜不遑而青雲之志衰矣而猶期不肖以
寸進乾隆戊申不肖入郡庠始慰夙望府君體旣衰時
有恙妣施孺人同庚六十五壽終府君年七十三壽終
諸孫林立茲當族衆修譜不肖忝與局事紀府君行實
始末附於編 嘉慶戊辰七月

世德門

二十
七世

肇進公傳

胡文蔚

公諱肇進字功序號升茹例授登仕佐郎生有至性母
早卒事父篤齋公至孝少窘甚傭人爲活月給酒肉悉
折乾遺父所得俸金除供父甘旨外一文不敢濫用篤
齋公晚年嗜飲公懼酒不給密鬻妻簪環託友人沽於
江右以待不時之需聞父有疾則星夜馳歸躬侍湯藥
必愈始復就傭篤齋公沒喪葬如禮又篤友于凡門戶
度支鉅細皆引爲己任不爲兄累初公之傭人也自念
非策稍積貲乃歸作糟邱於家門設肆行沽麴蘖不假
工人手以故青州從事之名日噪家道亦隆匕起配胡
氏始艱於嗣胤適有以子鬻者費數十金買之越數月

其子遁去父送之歸公曰彼既不願爲吾子何強爲汝
早攜歸吾不索汝價未幾而胡氏生子人謂爲還子之
報云公素端重不苟言笑統褲子弟一飲費數百錢公
輒厭薄之或語涉不莊則正言叱止一日有客沉醉寄
白銀若干酒醒不知所在謂已亡矣偶與公語及公曰
銀韞吾櫝汝忘之耶畀如其數又有客遺失金釧爲公
拾得次日客誑公遺失銅釧公笑曰金釧在此銅者則
未之見也出還之公出自寒微少讀詩書而行事多爲
人所難及誠足以風世也故因其子之請而之爲傳

古槐門

二十
七世

佐埔公行狀

胡廷玉

公官諱啟元字紹宣號若思故修職郎鄉飲賓太學生南溪公之第三子而玉父數十年契好之老友也公幼業儒初學爲文有筆致比長聞璜川黃明經有師範往從之遊學益進一時同門之士以文章鳴者交口推許而公顧以數竒文戰屢不利且見家政繁劇父年老遂棄舉子業循例授太學生江姓者故巨族也世居長田之大塢公旣移家清華距長田十里族有大事每集議必需公至至則立剖決雖年來公以老病不能出族人就訟曲直者常屢交戶外及没人咸思之公性儉垂老不御絹帛顧遇善舉輒毅然勇赴他如奉親事兄訓子

處友諸大端與其家風世德之見稱於時賢者前輩張
培風明府李椿田水部於公父行狀及公壽序中紀焉
頗詳不具著配詹孺人有賢德先公十餘年卒公生於
乾隆己巳歿於道光壬辰享年八十有四子五錫鈞欽
鑑鏞孫十五孫女七曾孫三公沒之日子孫衰經而出
者男女四十有五人論者謂振振繩繩方興未艾皆公
厚德之報云 道光十三年仲冬月

古槐門

二十世 補公傳

胡廷球

公學諱得秀字靈一立菴其號也少承庭訓習舉子業
文運蹇厄年四十始補郡博士弟子員公先人霽齋公

亦邑文學晚年家計窘迫遂青雲有倦飛意而猶屬望
於公顧鵬路脩阻俱以一衿老公性謹愨不苟言笑遇
事小心歛避不欲上人以故無赫赫聲譽亦不受鄉黨
指摘家貧研耕在塾中終日危坐無情容訓子弟循循
規矩與客接禮文周至疎放者每憚與近娶妻三不獲
偕老生子三亦先後歿子遺一孫又養他姓祀不斬者
幾希矣公家數代淳厚公又恂恂儒者乃餒而等若敖
氏鬼豈天道茫茫有不可知者耶 道光甲辰冬

古槐門

二十
八世

得祿公行狀

胡世卿

公諱壽卿字天贊號翼山世居清華雙河爲濟陽望族

昆玉四公居長家素貧髫齡就塾值輟帳卽任樵採尊
人元益公被咬傷指公聞馬蹄香治之最效卽私往婺
南百餘里古寺取歸時年甫十有一耳迨年十三不能
備束脩禮遂棄學幸有舅力能負重日馳百餘里遂隨
父傭休西漸積貲自立市肆販糧食三十一歲父沒又
越十年生產益潤公挾湖海襟期不願局鄉井乃揭所
有更稱貸爲茶業運往粵東不幸被洋行虧空旋聞母
病自嶺南萬里捨舟從陸兼程馳歸行囊羞澁抵里僅
餘數十錢一慟靈前聞者皆涕自是室如懸磬諸逋叢
索顧志意不亂卒得歸夙放及粵攤償慨然曰甯人負

我我不負人將各借子母暫酬其半復協昆仲營舊業
遂力解宿欠無不清款年四十五始昆仲析箸居常懷
仁慕義於貧苦急難及衆善舉必量施之爲排解費錢
而了無德色義阡有損務培葺之至如能武而無所矜
善醫而多所濟明地理而妥先墓敦友誼而資切磋皆
其過人而不覺爲異者乃病肝氣有年竟一發至數月
而逝時嘉慶庚午九月二十三日距生於乾隆丁丑六
月初五日享年五十四配余氏子二澤櫬澤林孫男二
孫女一予時與鄰居生平所莫逆者君其一凡緩急常
變罔弗視如己事而所謂以智慧劍破煩惱賊者吾猶

遜焉暇日攜手出眺好山好水皆以入情猶憶去冬奉
勸榮捐君却以術者謂歲行在午命將終固強之而後
可庸詎知果有驗也嗚呼傷已 嘉慶庚午孟冬

古槐門

二十
八世

得祿公配余孺人行狀

余煌

孺人姓余氏沱川鄆村有龔公女清華登仕郎翌山江
先生德配也孺人生而幽靜性尤明慧在父母膝下時
兄弟輩談古列女傳輒喜聽之故女德無間九齡卽賦
于歸時翌山先生尊人元益公偕配查孺人均在堂先
生有弟方六歲家世綦貧百事拮据外政有先生維持
內則孺人是賴孺人侍奉甘旨常得堂上歡釵荆裙布

躬操井臼嗣三四叔及二姑生孺人視同骨肉佐姑攜
撫飲食衣服時刻照應翁姑益以此賢孺人乾隆丁未
元益公棄世翌山先生賈江右未歸孺人歛殯如禮翌
山先生具湖海志氣善持籌家業稍裕嗣業茶往粵徃
返動經半載姑氏年老賴孺人服事歲戊午姑病孺人
侍之愈謹湯藥親嘗衣不解帶者匝月姑沒後治喪一
如喪舅時是冬翌山先生聞訃旋里因茶務虧空貲本
折損兼以風木之悲崩摧五內孺人於苦塊中勸慰曰
夫家故貧吾處之有素矣願毋以此挫厥志今膺大故
宜節哀順變以安九原之心此孺人之能識大義也妯

江陰縣志卷四
媿數人以誠相待以和相處從無忤言分居時凡日用
什物推多取少有讓無爭鄰里莫不稱賢德歲己巳翌
山先生援例授登仕郎銜越一載歸道山孺人拭淚
語二子曰爾父已逝徒痛哭罔濟宜立志把持生理以
無隳前人業家庭事有我無慮也於是令嗣奮發自立
店業日新庚辰歲孺人春秋六十有三患腫症粒食不
沾者數日旋服藥愈而精神漸衰先是次子澤林素患
腹痛死而復甦者屢孺人慮其先卒邇來痼疾獲愈孺
人喜甚歲壬午爲二子析箸身就清閒癸未林舉一男
孺人益喜今春微病謂二子曰吾少時欲一飽不可得

今以病故有佳殺而不欲食然則孺人之嘗艱苦於壯
年者既深而天之報孺人於晚年者亦不爲不厚矣孺
人事上能孝事夫能敬勉二子以正業而性仁厚鄰里
有貧窶告貸者無不周恤之一生大節載在口碑孺人
雖病未嘗一日卧床子婦孫曾未嘗一日離膝下偶有
親眷問疾言笑如舊乃問疾者方出門而孺人頓逝蓋
今年六月二十三日未時也距生於乾隆戊寅二月十
二日子時享年六十有七子二長澤櫜次澤林孫男五
孫女五曾孫二 道光甲申七月

種德門

二十
八世

源書公行狀

胡廷玉

君諱源書字亦文號蕉山生有異質自幼就塾器識已
不凡少長遊玉山戴孝廉門今吳進士述菴戴廣文琴
堂吳孝廉竹樓皆同門友一時議論學識相上下然數
竒困於場屋屢戰俱不利某歲院試文已入彀因額溢
抑置僧生朋儕爲扼腕君不介意益肆力於學比年益
長志卒不就始棄舉子業是時兩親相繼下世生計日
絀然猶遇義勇爲里有種德橋君祖所創建也歲癸未
崩於洪水往來不便君慨然引爲己責急集同志募修
勞役者三載乃告竣性質直而寓精明人或以事來告
輒盡言無隱見里有爭曲直者必力爲剖析或費己財

不惜君沒後思君者多爲出涕君以乾隆戊戌七月二十
十二日未時生今道光己丑六月十七午時歿年五十
有二妻胡氏性和厚生子四松茂松盛松健松錦女一
孫男一孫女三 道光十九年孟秋月

敘樂門

二十世

時瑛公行述

兄得秀

弟學名潮字清選處士明有伯豕嗣也狀貌岐嶷性質
聰敏髫齡入塾業師雅器重之無何明有伯早世弟甫
成童其季尚幼不得已部署家政弗克卒舉子業素練
達不好弄聲伎遊宴博奕嬉戲等事淡然無所與惟隆
禮師儒以課其弟若子以故揚鑣繼起揆文奮武泮壁

聯輝不一而足弟亦以俊秀身列成均其承奉大母與
母也家事巨細必以咨決大母沒哀毀踰常尤念母青
年矢志生前已爲請旌惜坊未建弟忽遘疾賫恨以
終祖穎斗公祀產幾廢弟同族眾協力司理卒得興復
穎斗子德時公祀事未舉弟獨力創立清明並置祀田
距長田十里曰高奢種德橋洪水衝圯弟領袖督理三
載工竣又浮邑北鄉有伏牛嶺上爲徽甯要道下爲鄱
浮通衢弟捐建茶亭施茶濟行旅往來者皆德焉他如
理墳墓治道塗修譜系皆董理精詳遇有理所不可者
輒正言斥之雖強悍不畏配余孺人內助稱賢生子四

女二弟歿於嘉慶甲戌十一月十七辰時距生於乾隆
辛未五月十八未時年六十四 嘉慶甲戌葭月

叙樂門二十八世時埂公傳

胡廷玉

公學諱正覺字亦先號抑齋以武試入郡庠世居長田
父早故母詹氏青年矢志公兄甫十歲公甫五歲撫養
婚教皆母是賴嘉慶間母已沐 旌節孝公白土生理
客景鎮最久鎮故有徽會館各雖六邑公設實則簿籍
記注嫠人無敢過問公至舉共司理十四年彌補缺空
更節貲新文昌閣及創設瘞埋諸善舉鎮河爲都昌人
霸踞婺無泊船所業瓷土者大受其累公訟之官始得

泊船婺人至今賴之配詹孺人子三次邑庠生孫五曾
孫一公以乾隆丙子九月初四日生道光庚寅八月初
四日歿壽七十有五 道光甲辰九月

世德門廿八世國振公傳

施彥彬

先生册諱春號小舫晚以梅自娛故又號梅癡生三歲
父相佐公見背母命青年矢志撫先生教之讀先生能
以色養有不當母意母輒對案不言必悚惶長跪以謝
不命之起不敢起其大父儒林郎廷億公生三子以先
生父紹弟廷鳳公後而廷億公性豪邁晚年貲財揮霍
殆盡先生曲承厥志傾己產奉養及廷億公夫婦繼逝

先生引爲己任不謀之諸昆族弟國民爲先生舊同事
歿後家無長物先生歲給其家不衰其孝友性成類如
此居恒好靜不喜與俗人居然人卽之又和氣一團從
無厲聲疾色職所分當爲者勇力赴之尤精書畫卽三
尺童子持一筴一絹求之無不如其意以去年少戰童
子軍文譽藉甚以額滿置佾者再乃循例入太學適道
咸間年荒時難遂不復爲進取計小隱市廛尋業茶於
申江爲行棧所負客羈三年蓋錙銖之見市井儂薄之
風非所樂習雖溷跡闖闖二十餘年無日不與翰墨詩
酒爲緣或時爲鄉里排解紛難故會計之任一委於人

致遞起遞躋卒至不名一錢嗚呼先生可謂篤行君子
矣自命鄉論秀之法廢而士之飭紀敦倫側身脩行者
多溫溫無所試老困寒羶甚或放浪江湖與賈豎伍借
楮墨以自抒憤悶之懷則雖有嘉言懿行足以垂不朽
亦終與編氓無異間嘗考先生生平使之得志其所樹
立必有可觀而第施之父子兄弟之間鄉鄰族黨之際
庸行之常末由表見此負才不遇之士所不能不撫躬
而同爲感慨也獨先生哉先生生長余十四歲曾共理華
川文社事旣親見其爲人又時與其詰嗣韞青茂才遊
故條次其大畧使世之蓄道德能文章者有所考云

光緒庚辰仲春

種德門

二十

源肇公傳

試用教諭

胡廷玉

公字紀修號敏齋授登仕佐郎居清華之雙河幼業儒
資穎冠儕輩嘗與玉同受學家故明經叔諱熾叔訓督
最嚴每日程課多爲同輩所不堪公處之行所無事既
又同受學潘故訓導諱道南每器許公旋因兩兄繼歿
棄舉子業佐尊人市肆生理及尊人歿偕兄子仍故業
時往來江右酷暑沍寒不避勞瘁嗣因糧食虧折千餘
金棄田產清還拮据數載不幸粵茶久失利虧空殆過
於舊自是醫創剜肉百方籌畫顧動輒齟齬若視其意

向所屬有故為之梗逆者以故年逾周甲大業不遂論者謂公固非戰之罪也公以乾隆乙卯年生咸豐丙辰年歿享壽六十有二娶胡氏生子二繼娶俞氏生子四孫八嗚呼公少負桑孔才視千金如拾芥且精神纖悉周至如獅子搏兔亦用全力中歲數奇屢起屢躓而意氣之盛曾不少挫卒困於遇英雄無用武地徒令抑鬱牢騷質志以沒悲夫 咸豐丙辰仲春月

叙樂門

二十世

銓淦公行述

子列琮

府君學諱錫榮字曙庭號樸齋兄弟四人府君居次大父時壤公敦龐淳厚府君生而穎異幼承庭訓長就外

傅潛心攻苦文譽藉甚無何赴試文場屢薦不售又兼
家運中落雁折絃斷嗣續未獲遵大父命再娶母氏俞
孺人年三十入始博青衿旋丁大父母憂哀毀骨立不
肖胞兄及叔子又同時殂謝府君遭際如此慘何可言
四旬外方生不肖府君每念先世孝友傳家先大父訓
子以廉隅自勵不爲毀方瓦合故府君於義利關頭辨
之必嚴平居布袍蔬食不因人熱窮通得失更置不爲
意府君嘗以昔賢不爲良相卽爲良醫故力習岐黃專
謀濟世凡遠近就醫者不別貧富不唯利視孳匕以活
人爲務府君制行不苟居貧守約束身於名教之中單

思於救濟之用髫年失恃其侍大父與繼大母能先意承志孝養有加歿後喪葬如禮老年來偶懷明發涕淚猶涔匕下愛日之忱終身弗衰天性然也待昆季友愛內外無間授生徒循匕禮法一以萬石君醕謹爲師嘗語不肖曰人不讀書不明大義能明大義奚必掇巍科躋膺仕爲足貴與人交率多布帛菽粟語有過面折不以機械待人人有以機械待之者亦置弗較居鄉見族黨倚樵爲活日朘月削四山濯濯常以此憂於是申條約禁斧斤今之材木森森生活得遂與造閣修祠費不下千金咸藉山貲以有成非府君之力弗及此其餘平

忿息爭化強扶弱難更僕數府君歿聞者罔不悼惜沱
川余燦雲明府舊姻好也輓府君聯曰忠厚端方不失
先民遺範學憲孫獎給扁額嗚呼此亦足以慰府君於
地下矣不肖深愧弗克負荷貽先人羞不敢以先德湮
沒不彰負戾滋重適修家乘因詳述其實行以資後人
觀感云 光緒庚辰春月

古槐門

二十世

澤椿公傳

鳳陽府
學訓導

俞起鯤

春海

君名澤椿自先世由長田遷清華雙河家貧務農未從
事詩書事親一以至誠兄弟四君君長待羣季友愛一
門之內人無間言惟性極狷絲毫不苟取嘗爲米肆任

春稱之多穀一石愕然曰彼誤也將以還之笑之者曰
此彼之誤於爾何與且幸彼誤多爲爾之利苟彼誤少
害將誰任乎君曰不可彼我皆謀生何可爲損人利己
之事卒還之其生平行事多類此歿年四十有三有丈
夫子四嗚呼以不識詩書之民而立心制行乃與夷齊
比潔敢目之爲凡民哉士大夫居其位蠹其國視所親
如陌路待倫類如寇仇者其於江君何如噫

古槐門

二十世

澤橙公行畧

江蘇婁縣知縣

朱龍光

燦雲

吾聞爲善者天報以福爲不善者天報以禍又聞積善
之家必有餘慶積不善之家必有餘殃古昔聖賢言報

施者綦詳邇有自清華來者報香翁居肆火災及身始
聞疑曰此禍也禍不罹善士旋報其次子與童孫女孫
三代同災益疑曰餘殃也殃不及積善家比接踵報者
無異詞猶謂傳者妄越日其親屬果以災聞並爲其孤
乞狀乃快然嘆曰竒矣慘矣善可爲不可爲善可積不
可積茫茫天道終莫解徬徨竟日不忍述又不敢不述
按公諱澤橙印文銘字質芳號香圃世居清華雙河因
設肆高川遂家焉其昆季四公行三甫入塾輒力學塾
師器之以家貧改習計然術時就教於老成老成輩又
咸器之公父常語人曰振家聲者望此子比長貸資設

肆雙河失利乃復賣傭恐貽堂上憂每婉言博歡晨夕
膳力致無乏己丑歲親知慕公耿介且精明邀賈高川
又貸資於人均諾其取信有素也出入皆公經紀終事
無舛誤同人皆服公以母早卽世恨未報恩又愧親善
未揚因列事請於郡侯彭得贈額父病侍湯藥無間病
篤囑遺租三十餘秤作殯事用公聞之極痛悼喪葬獨
力部署躄踊哭泣感動旁人於此見公之孝公中年多
故弟昆猶子輩先後繼逝公時加周恤並以父囑作殯
葬之租歲分給飲助薪水其乏生計者招入己肆今成
立皆婚娶於此見公之友而處鄉黨宗族友朋自率天

眞任人嘲笑遇紛爭力解必釋見義舉必助以成自丁
巳歲地方設局團練當道稔公行節次舉辦不避怨不
辭艱甚至經費不支慷慨敷用無吝色邑宰陳初下車
又物色公招詣署委經理排內善後事宜其見重官長
者由見推鄉評所致舊夏公七十壽陳侯獎是亦爲政
額蓋隱括孝友大節以激勸來茲迺宜福而宜禍宜餘
慶而餘殃論者謂善不必作或謂數至此極吾意不然
大抵生則榮沒則已腐同草木凡災及者多作不善輩
或彰其隱惡胡公偕丈夫子國先及國先子同及於難
四方聞者扼腕咨嗟自是善益彰名益噪將必流傳不

河陽治邑系譜卷四
替則天以奇難扼公正天以盛名界公非若身甫沒姓
氏就湮者比蒼蒼者天其然乎抑報施有失乎吾將翹
首問之公生乾隆乙卯七月二十二子時慘歿於同治
乙丑七月十九戌時得年七十一歲子二孫二女孫二

種德門

二十世
九世

松林公行狀

胡綬芝

公學諱朝宗字汝儒號西苑先是由長田徙居清華與
綬爲鄰昔嘗受業家先大人之門同筆硯者數載性謹
厚嗜學訥於言而敏於行先大人深嘉許之生有至性
幼失恃賴繼祖母俞太孺人撫養成立公事太孺人亦
孝謹繼母俞性嚴烈子婦畏不敢近而公和氣怡色惴

惴焉恒以不得歡心爲懼兄弟六人公與伯兄仰桓爲
同懷餘皆異母弟中年雁行多故兼境遇窘促而於諸
猶子輩多勉力襄助咸豐間粵氛竊發督辦皖南軍務
三品京堂張檄委王羅蔣諸將設防清華時河道爲賊
梗塞舟不能通軍糧由陸車運糧台吳君廉公能聘與
幫辦公殫精竭慮奔馳况瘁張嘉公勛獎六品頭銜里
有種德橋衢通七省公先人創首建造年久傾圮公日
夜焦勞自恨力綿不能繼志然與人爲善之念時厯於
懷屢集同人僉議橋得重建他善行不具述今春三月
公捐館舍公子炳濟以綬悉公生平墨經踵門請狀綬

聞見之下觸景傷懷回憶屏山肄業一時同堂十數人
善相勸過相規甚至嬉笑怒罵優狎忘形歷七如前日
事卅年來或幽冥異路或天各一方惟與公共數晨夕
已不勝今昔之感今公又成永訣有不覺淚隨筆下者
因附此以誌慟云

〔乙卯按〕公配黃孺人有賢德繼姑性善怒孺人事之謹姑年八旬孺人亦六十敬慎無少
懈兩伯姒歿遺孤幼孺人撫育之生男女十人均親乳哺黃孝廉爲作壽序節錄附此

古槐門

二十
九世

澤林公行狀

胡廷玉

公諱茂先字錦成號古崖例授登仕佐郎幼聰敏以家
貧故早離鄉塾從戚某遠客上海比受室始歸佐尊人
里肆生理稍暇輒手書一卷自四子五經史漢及醫卜

星相與形家言靡不究覽久之俱得要領雖老於儒者
不是過玉與比鄰每晤必劇譚竟日獲益最多父翌山
公患肝氣每發痛且劇或累日或月乃愈公侍疾惟謹
無廢離者凡數載母余孺人得腫脹疾侍如之兄澗泉
先生以明歲年六十與公白髮相友愛遇事必咨稟而
行或所見相左輒婉言規諫不爲阿徇至義舉應爲父
未克卒事者以次偕兄踵成之爲人嚴氣正性待親故
甚篤遇稍不可於意必召至密地直言極論人咸憚服
有過者懼公知公以乾隆癸卯生道光戊戌歿壽五十
六配查孺人生子二繼配俞孺人玉於公家三世至好

且玉婿公季子也來請狀嗚呼玉何忍狀公哉然公一生大概知之深者莫如玉則又何忍竟不公狀姑爲次其行實如右
道光戊戌季春月

古槐門三十世列源公傳

胡廷玉

古梅

躍于姓江諱列源學名錫淵號月潭玉故友登仕郎古崖公冢嗣也廣額而尖鼻面如棗核笑不見目語言作鼻塞聲少業儒以家政無分肩遂離鄉塾佐古崖公糧食生理母患腫症卧踰半載躍于侍疾無廢離母沒幼弟錫歡甫二歲保抱携持悉躍于賴後以癰瘍愛仲弟衍益篤偕寢饋者七八年教之讀書籍筆硯及塾中日

用什物以時給有新蔬必親饋衍食然後食同人至今稱之古崖公有肝脾疾稍多食腹輒疼疼則呼號踴躍如病狂狀方藥日四五易卒不效必重劑承氣湯下之始少間其下物如羊矢如乾漆濡者如淖如醬如墨水腥氣中顙莫敢迫近躍于獨俯首槓窬中子細辨認甚或搗置掌上指撚爪掐鼻嗅罔避穢濁如是者七八載歎有醫程某得故名醫汪宗藩真傳躍于念古崖公服硝黃過多真氣大損不遠數百里侍古崖公輿往凡撫摩湯藥旅館中安便如家居古崖公病益劇躍于夜不就寢獨伴孤燈坐中庭藥爐下假寐時天氣嚴寒霜風

凜栗侵迫不自覺忽夢中驚聞呻吟聲遽投袂起渾身
振慄齒聲號聲相應聞者悲之與人交重然諾俞某者
躍于家舊食客也婦孕彌月躍于謂曰若生女願以子
爲公婿已而果然或以某家貧多病勸辭婚不可卒聘
之尤輕財重義有所求無弗與雖古崖公嚴約子弟一
錢不得自主必稱貸給之嶺下某舊負躍于家金遣躍
于往索適某病醫治無力躍于置債勿問更給錢米且
星歸爲延醫買藥又某負躍于家米價以歲歉難爲活
復求躍于躍于贈金俾還舊而貸新焉其他爲戚友累
代償者不具舉以故躍于貸金於人甚重而人貸於躍

于者券滿篋病篤強起檢券一一手裂焚之其存者惟
小冊一則貸於人之細目也酷嗜火酒喜冷飲早起詣
酒家沽數錢如鯨吸川信口而盡屏息不語急趨而出
及晝如之夜又如之醉則隨在偃卧風露不避或呼醒
揚目視良久復鼾鼾熟睡卒以致病醫勸斷酒唯唯數
日後飲如故以虛損終於家年二十有八妻查氏子盛
湓時僅二齡查耐苦撫孤今出就外傅矣嗚呼躍于父
以精明兼渾厚鄉黨稱長者而躍于亦夙承庭訓處事
多能人所難乃上下二十年間疾病死喪顛倒莫狀豈
天道果無知耶抑所謂命者天亦無能爲主耶然而理

之所在數終隨之猶憶前二年躍于子以痘重症幸安
痊後體更堅實今者宗譜續修而躍于弟亦先數月生
子則安知非天之欲厚於將來耶是爲傳

古槐門三十世列辛公傳

胡文蔚

蘭芳上舍爲故登仕郎瑞屏江公之孫瑞屏公正骨專
家治法多前人所未及沒後子孫多能繼志而上舍獨
得真傳人未之知也一日有輿夫肩創痛甚求醫於某
某謂其無以爲酬麾諸門外上舍愀然曰醫所以濟人
奈何乘人危以爲利乎招至家拯之由是延醫者接踵
於門黃家莊村人相鬪金刃破腹腸出氣奄然欲絕訟

於官謂必死上舍爲理其腸納腹中以藥線縫創口若
縫裳然更敷以藥獲保無恙沱川余某自剪其喉氣不
屬藥亦不能下咽上舍從容察視療治愈詩春施某刃
傷後復自刎頸血如湧泉家人忿欲構訟上舍曰若待
訟而後醫血乾氣絕矣症極險吾勉治之可許不死後
果如其言橫亭俞某煉石灰爲業兩工人失足墮灰桶
中急援出則皮盡脫下體無完膚奔叩上舍門上舍星
夜馳往塗以藥痛立止內外交治不兩月皆痊愈就傭
如故上舍名益噪刀圭所施靡不應手取效然聲價未
嘗自高風霜雨雪有請必往綽有大父風質聰敏少年

遭家多故早離鄉塾既壯潛心醫學聞有開驗墳地者
輒往視骸骨躬爲搜檢左右上下各歸其所以故一身
骨若干節何以生何以斷何以續皆了然於胸雖三折
肱不是過惜天不永年賫志沒上舍學諱溫其字玉如
號蘭芳沒之七年江氏續修宗譜其德配胡孺人有賢
德痛夫之活人而不壽也命其子婿具行實爲上舍請
傳蔚不敢辭於是乎書
光緒庚辰春月

附長田像贊

忠德門樂平小坑

二十世

嘉祥公贊

胡燮元

孝稱漢祚忠顯鄱陽累代簪笏歷朝玉堂宗功祖德源

遠流長嗣續瓜瓞箕裘克昌清華衍派岨麓遷鄉樹德
滋大卜居發祥遞傳舅氏巨族之光中通外直濁激清
揚涉世無忤出言有章鹿車共挽蘭玉齊芳緬想風範
德音不忘

古槐門

二十世

爾松公贊

胡鵬昆

公諱爾松字秦五號正中學名梅侍御景房公裔春官
詔公會孫隱士德升公冢子性穎異力學補博士弟子
員拔幟冠軍數戰棘闡未捷公實德深純十五而孤克
娛母志兄弟友愛尊祖敬宗輕財重義其持躬凜凜然
其接物恂匕然斯誠盛德蘊於胸而光輝發於外者歟

爾松公配胡孺人贊

再姪雲舉

孺人之壽近百高年孺人之福疊賜絹綿含飴笑弄靜
好依然洵曙園之淑女相泮璧之高賢垂鶴髮粉熊圓
四代蘭芝毓砌前今日者勞逸訓猶在杯棬澤尚全母
儀偕圖畫以永傳

世德門

二十
五世

永煇公配李孺人贊

甘肅靈
州知州

黃

恩

江節母李孺人甲椿靜軒公次女也幼歸江事姑孝舉
丈夫子二日爵曰桂年二十七而寡長子三歲次猶遺
腹撫孤婚教成立贊曰 四德夙嫺女中人傑砥操如
松揭衷若雪勤勞則鍼管不離儉樸則絲羅弗悅教子

以端方奉姑必豐潔嗇於遇而彌貞追柳歐之風烈

古槐門

二十
六世

廷燻公贊

并序

胡際清

江子澗泉論交最早每與談必及祖宗往事今正人日
余詣其家見壁間圖像非一讀題贊知爲某某公有一
未題者澗泉曰此曾祖像也因述曾祖諱廷燻字自鎔
號隱濱性渾樸承父秦五公教益加篤茶每日摒擋家
事外惟訓諸子以繩祖武爲事衣取蔽寒食取充腹於
勢利紛華無歆羨心鄉之人有以名動者曾祖曰實至
名歸吾無實焉望名又有以利炫者曾祖曰富不可求
豈能倖而致乎唯是開簾引月汲水灌花不管相如四

壁之蕭條且作樂天三間之瀟灑心如白水身老青山
其爲人行事大略如此余曰此誠先民之矩矱也今人
名則驚之利則趨之知巧百出不自知爲用計用術之
非正而洋洋得意以欺世而驕人聞隱濱公之風亦可
少愧矣澗泉曰誠如子言蓋爲曾祖作讚因贊曰
不好名何所爭不徇利誰爲忌心無不足世網難局不
求瑰奇莫比操持瞻斯像想斯人其殆爲無懷氏之民
抑葛天氏之民

古槐門

二十
六世

廷煒公偕配胡孺人贊

胡炳照

躋公之堂公容伊邇博帶峩冠考祥視履不振家聲雲

霞蔚起老成典型表厥宅里亦越孺人淑慎容止陶孟
母儀克輔夫子皓髮相莊圭璧雙美羅拜雍雍並顧而
喜

種德門

二十
六世

培連公暨胡孺人贊

進士內
閣中書

施

彰

佳麗山川篤生偉人渾金璞玉溫潤精純少遭屯蹇閱
歷艱卒處困而貞松心竹筠長邀天眷蔗境漸臻奉先
思孝矩獲克遵經營締造殫厥精神既成寢廟堂構聿
新上繩祖武著績河濱輿梁脩葺領袖鄉鄰橋各種德
渡啟迷津幽光潛德壽諸貞珉天立厥配四德是循鹿
車鴻案如友如賓一堂偕老樂叙天倫遐齡克享福自

天申蔭遺後嗣鳳翽麟振方輿未艾藹藹長春

古槐門二十世佐墉公贊

余煌

蒼蒼柏鬱七松誰其似之江翁之容憶其生前式禮無
愆羨其身後嘉名悠久德行醅利澤深裨益乎斯世楷
模乎後昆天道福善厥理常新不于其身在其子孫將
見而昌而熾榮寵集門

古槐門二十世趙元公暨查孺人傳贊 余煌

先生勤儉有德人也髫年失怙恃家貧幾難自立甫成
童卽傭工糊口性好學勞力餘暇手不釋卷習書習算
爲姻戚主會計有年廉而且能名譽甚著以俸貲娶鳳

山查孺人舉丈夫子四女三食指日多仍服賈以謀薪
水孺人性柔淑佐家政勤且儉後賴嗣君經營肆業家
日隆起卒時年俱週甲以外迄今四代孫曾不下三四
十人於戲克昌厥後此天之所以報者歟贊曰

性直而介爲謀必忠不吐不茹德協乎中少則孤苦老
而亨通內助有賢井臼勞躬貧無諍語富守素風淑慎
如一壺範罕同詩歌詒穀易贊有終螽斯蟄蟄佑啟無
窮

古槐門

二十
八世

得祿公暨余孺人贊

恩貢生

胡

熾

濟陽翊山翁瓜葛聯姻親又兼世誼重懿行知之真豈

惟性亢直三代道猶存豈惟持己嚴朝夕厲精神豈惟
待人寬自反在禮仁豈惟禦火災水龍鎮一村友愛撫
諸弟佐父誨諄諄諸弟皆卓立花萼含芳芬更得余孺
人家政內助殷不矜亦不伐克儉而克勤妯娌閨壺間
和氣藹氤氳余自卅載來景仰在一心但恨典型謝瞻
像事如新撫拾吾所知抒寫碧窗陰

古槐門

二十
八世

得福公傳贊

胡廷玉

公又名起濤字凝五號魯齋國子生兒時窘甚比長以
木業游白門失利歸設肆爲米穀生理銖寸累積歷數
十載家日起嗣以重資假人爲所誤畢生苦辛盡付東

流遂以是致疾年六十八卒嗚呼公負貸殖才平生算
無遺策顧以一時輕信從井救人卒至抑鬱牢騷賚恨
以終悲夫公沒十七年其孫列榮以公像屬題贊曰
嗟嗟我公少具心計億則屢中羣推早歲及稍羸餘惜
猶鎔銖衣服飲食節儉自如晚爲朋友誼重財輕無鍊
錯鑄囊橐全傾公身已死公貌如生無限遺恨我爲不
平

古槐門

二十
八世

得貞公暨胡孺人傳贊

胡鳳翔

公諱得貞字懷遠號近齋先世由長田徙居清華幼甚
窘樵採自活稍長傭春於人市肆中多其誠實每穀石

計應得米若干惟所命莫與爭者中歲稍積微貲至晚境益裕子婦膳養稍豐輒却不食性畏謹言訥七如不出口事親竭力供甘旨兄弟四人怡怡相得自少至老無間言與人交和氣藹然雖意甚不可無疾聲厲色鄉族中咸推長者嫡配胡氏性和柔能與公共艱苦公之所以享安平而獲餘慶令嗣之所以成立而熾昌者皆內助之賢有以致之贊曰公貌維虔公度維淵不彫不琢根本性天昭昭其行訥訥其言胡太孺人夕惕朝乾光前裕後於萬斯年

古槐門

二十世

得祥公匾額小照讚

此翁福壽都緣德彰活人有術排難多方蘭階掩映鴻
案相莊敬奉堂額積厚流光 六十歲 王鳳生

必使無訟極力解紛必欲活人醫藥維殷有益於世不

惜辛勤存心濟物可以額君 七十歲

邑尊裘

有心濟世有技活人生死肉骨效驗如神一言以贈着

手生春修德獲報壽世壽身 八十歲

郡尊達

飲池壽世古滄于子解紛排難今魯仲連敦厚周慎龍

伯高之流亞冲夷高曠陶南村之神仙 余龍光

者箇老翁容顏温粹春風滿懷自壽壽世日永閒廷童

孫共戲樂事相傳一枝如意

余 煌

採藥偷餘暇披襟柳影中
午陰篩密翠斜照漏疏紅
涼拂雙髭雪春生滿面風
孫兒莫辨識含弄偶攜童

胡廷玉

古槐門

二十世

澤櫃公偕胡孺人贊

戴文彬

巖巖其貌奕奕其神不事雕琢務本率真不矜才氣仗
義敦倫無忝夙夜無愧天人渾金璞玉藹然可親厥配
賢淑相敬如賓荆釵裙布能儉能勤敬姜陶湛母儀備
循以成家政以裕後昆

古槐門

二十世

文銘公贊

即澤橙公

胡廷球

公始業儒既就商籌算多中以糧食起家里有忿爭時

賴排解曩寇警團練起局公任局事勞怨勿避贊曰
碌碌凡輩疇見本真晚近如公罕有其倫屈身闖闖生
意經綸棋爭先著事業煥新里紛待解靡不逡巡躬親
團務有裨里鄰八年襄事公爾忘身迹厥生平古道是
敦拜瞻容像如見其人

古槐門

三十世

列時公暨余孺人傳贊

戴

垣

公諱列時字篆賓號闇齋性孝友幼侍庭幃和氣婉容
比長佐父澗泉公設肆市廛辛勤累積家業隆起父晚
年目失明命析箸公推甘讓肥生平酷嗜書史尤精岐
黃術凡求醫者無論貧富雖寒暑昏夜均往診七愈不

索謝謝亦弗受其他疏財仗義濟急賙貧大率類此德
配孺人貞靜幽閑以禮自守贊曰 川媚山輝靈鍾秀
結郡溯濟陽代生英哲洪惟我公崇品植節君陳一篇
孝友無缺長習生涯閒探脈訣樂善好施救苦扶子孺
人懿範梁孟堪頡內助芳徽鄉鄰傳說惟積厚者流光
小綿延於瓜瓞

羅雲

五十六世

嘉稷公行狀

以下錄羅雲譜

汪天榮

昔余館金源公館泓田往來酬酢相得甚歡歲癸亥公
以高年養尊於家常曳杖逍遙至館中談論古今事竟
日不倦今秋於泓田重覩光儀童顏鶴髮正擬來歲耄

辰偕同人製錦稱觴以爲公壽何意星沉南極色黯羅
川而遂溘然長逝耶斯時公之門人輓章駢集公嫡孫
靈昭恐公潛德隱而弗彰而請狀於予按公諱嘉稷字
育民號桐山系出濟陽世爲星江望族祖應光公積善
成德譽望遍鄉隣邑侯金公重其誼贈額曰善民翹楚
迄今稽譜牒考邑乘令人有餘慕焉繼此而紹箕裘者
卽公之父發元公性剛直分圖立約扶弱抑強十餘村
咸賴之子二公其長也生而穎異自少就外傅卽有意
詩書長而研求載籍人多以大器期之奈功名弗克如
願而敦倫睦族賑苦恤貧遵承父命迎姊歸甯撫甥成

立皆其德之可傳者他如祖廟告成興復祀田種種實
行蓋有非人所能及矣公生於康熙丙辰四月十五日
亥時歿於乾隆甲戌九月十四日巳時盲年七十九元
配汪氏有賢德先公卒丈夫子六人曰俊曰傑曰仕曰
佐曰位曰俶皆忠勤豪邁取重於人女二孫十人曾孫
三人一堂四世多福多壽多男子余不敏弗克彰其隱
德姑就所素悉者狀之若志若銘以俟當世之作者
乾隆十九年季冬月

又^{五十}起倫公暨查孺人合傳

胡炳蔚

予入羅雲譜局謬膺筆墨之任因得與秀山先生通款

浴見其步履中繩墨語言黜輕躁溫柔敦厚之意洋溢於晨夕酌酢之間竊謂老成典型淵源必有自也已而詢其先世知先生之父起倫公字全五號雲峯棲跡林泉日惟肆力詩書提鉛握槧不斤斤於制藝與人爭後先得失居常語人曰德行文藝本末攸分顧不可偏廢學者當束身圭璧澤躬爾雅若科名富貴儻來之物非務實者之所以自待也吾幼時於趨庭之日里塾之中見吾父旗山公嚴氣正性不假聲色而矩步繩趨以身教不以言教比長益知其立心制行耿介端方重然諾慎取與強不懾弱必矜所以飭家庭者在是所以輯宗

族者亦在是至於專精文藝書法尤獨出冠時則又柳公權所謂心正則筆正者吾用是益思自勵期無負旗山公數十年式穀之至意并思慰吾母垂暮屬望之深心此雲峯公所諳諳焉語諸後進者其象賢濟美洵可觀矣公淑配查孺人相夫子事舅姑克盡婦道乾隆甲申歲雲峯公以譜牒當續修偕其昆季奔走於謝坑之祖居協議興工不辭領袖三載譜事甫竣公以勤勞爲二豎所撓一蹶遂不復起易簀之日深以不得終事太孺人爲恨查孺人以太孺人之在堂也恐或知之廼於哀痛之餘爲彌縫之計先屬闔戶慎密無稍洩復於合

村挨戶泣訴乞隱其事惟託於會宗未返以慰姑念如是者幾六年每年必假接客間平安書札及佐膳之費持橐告諸堂上使勿疑慮而定省溫清必躬必親婦完夫職此其至誠惻怛苦心孤詣直足以動天地而感鬼神豈僅克慰雲峯先生之靈於地下哉公三子長廷鳳次廷虎居三者爲廷珍卽秀山先生是也先生心期濟世專擅岐黃百求之而百應之且百效之人曰雲峯公當日曾以此擅名矣則卽以茲藝爲家學淵源也可嘉慶己卯仲夏

又五十七世起伋公傳

黃寅

江公起，字忠五，少家貧，力學授徒於涪坊者二十餘載。後又家居，訓其鄉之子弟，又二十餘載。公之祖應光，公祀典，以及祀租皆賴公爲之經理，而又多方以厚其基，以圖其久。公雖處困乏，而祀典所留遺一毫不敢私取。今果子孫善繼善述，祀租增益累百盈千，亦可以慰公九原。下已至公生平正直，臨財不苟，見義必爲排難解紛。年高德邵，其益於鄉鄰者不少。此又公之立身行己所不可及者。茲因其後昆請傳而謹述之。

又五十八世廷鴻公暨金宜人合傳

黃寅

公羅雲村人也。少家貧，以手藝營生。其時雙親在堂，又

有兄弟雖日進無幾必竭力供甘旨生平安分守亡一
芥不苟取凡鄰里爭訟必力爲排解由是正直之聲名
爲一鄉所重娶金宜人克循婦道侍翁姑和妯娌持家
勤儉黽勉同心宜人經理於內公治生於外古人挽鹿
之風無多讓焉公得宜人之內助不但一門之內和氣
藹然并日夕勤事針黹以添薪水意謂大富由天小康
由勤日積月累幸有餘貲營構數椽以蔽風雨所謂夫
婦和而家道成也然宜人尤有足誌者里有貧乏必周
恤之夫婦反目必解之甚有琴瑟不調決欲再醮者宜
人必多方挽回之其後兒女成行伉儷如初未嘗不感

宜人之德也且又通幼科治產難活人難以數計雖古
人謂女子尚德不尚才實為無德者言之以宜人之賢
而才德兼優其為內助何如也子勝金孫九人鏞例貢
生鏞 誥授奉政大夫公與宜人得封如例餘多列
名太學僉謂積善之家宜膺厚報理不誣也今因其嗣
請傳於寅寅不獲辭遂援筆誌之

文

五十八世

廷虎公暨俞孺人合傳

黃古寅

公字英林號鎮山余硯友有孚曾祖也自少立志經營
工於握算設肆於隣村沱口雖身在闔閭而正直存於
心忠信孚於人在鄉在外人咸稱道由是族中耆老知

公可付以重任也因力勸公歸凡祠祀一切眾務羣推
公經理自始至終十餘年之久秉公持正其有裨於眾
事者甚鉅雖村中婦孺見公無不知敬焉然公尤有不
可及者明醫理而志在濟人每遇疾病必臨門代爲診
視貧無藥費者謀助之又嘗製藥送人一毫不取其輕
財好善可知矣至村人生歿葬娶難於部署者必竭力
周恤惠澤及人至今猶載口碑焉公配俞孺人勤儉持
家而恤人之貧周人之急與公一德宜其同享高年繞
膝含飴子孫繼美今曾孫有孚卓然自立攻苦下帷郡
試冠軍芹香高掇前程遠大正未有艾是皆公所留貽

亦可見報施之不爽矣爰叙其梗概而爲之傳

又五十八世光煥公祖父三世傳

胡炳蔚

江姓族居羅雲數十世矣余素稔其名而未詣其地邇年始與江族少長相識而仰慕甚深者則耆彥質齋先生是也先生名光煥字有文號質齋與余族兄萃岸爲表親又素有文字契往往道及先生文藝而尤津津於先生之行芳志潔丁丑冬江族議修宗譜以領袖屬之先生先生乃延余主修入局後挹先生道貌及所見之於楮墨間者已知族兄所言非溢美也聚首一載更稔其實蓋所以承先而裕後有厯厯可溯者先生大父振

明公性情忠厚意氣和平壽踰古稀有五陳縣主額其
居曰仁德堂三槐並茂苗裔叢芳迄今登其堂者可想
見其爲人父起忠公丰姿颯爽以建置課讀振其家聲
以解忿息爭輯其宗族先生少習舉業屢試未售以家
世寒澁應近鄰塾師之聘督課之暇勤於筆硯太翁年
老多病幸館舍密邇朝往暮歸躬持湯藥未嘗廢離疾
篤呼籲願以身代太翁卒不起先生喪盡其禮以繼兄
均分產業殯費則獨任之洵足式里閭而矯薄俗焉旣
壯棄儒服賈爲懋遷計經營有年勞而鮮濟乾隆壬子
冬輯橐歸里急於省墓以三十一世澣公祖地傾圮會

集各派鳩工繕治煥然一新昔太翁存田租十二秤爲
先人清明祭掃之費先生謹持其業并竭力增置爲經
久計又總理合祠清明各會秉公持正賬籍無私雖婦
孺亦知其爲清白也族興確業爲強鄰所撓滋訟牽控
公費不足遂廢私橐族中淡然忘之先生亦夷然置之
家居數十載子姪輩課以耕讀無惰遊之患鄉黨偶有
爭訟先生從容曉諭冰解凍釋幾令滋事者悔且愧先
生岳父西源俞子達者商於姑蘇岳母卽其族姑子名
恬甫九齡姑病逝俞公挈子就蘇續娶後又喪明死亡
相繼晚又續娶老蚌生珠岳亦捐館舍於外孤寡相仍

先生惻然傷之不憚千里奔挈眷屬往返盤貲皆自備
迨歸里課遺孤至於成立此非德之可傳者耶歲癸酉
府教授稔其行舉先生於賓筵贈額曰品行冠羣戊寅
夏先生七旬華誕親朋製錦稱觴誇爲盛事先生獨以
譜事仔肩念無旁貸晝夜秉筆無濫無遺同懷弟早歿
無傳惻然追念紹以次子永保墳墓編入新譜宗派有
零丁無力修譜者先生令載世系送局免其丁費此又
得諸目覩而仁孝之思愷惻之念乃余所樂語諸族兄
萃岸而相與流連往復不置者也世之謬以耆彥自許
者視先生何如也耶

嘉慶乙卯孟夏月

又五十九世永昌公暨賀孺人傳

浙江仙居縣知縣

余麗元

傳者傳也非言行可風不傳慨自近世谿刻風行可傳者百不獲一羅雲江姓諱永昌公真言行可風也公幼時肄業金陵資質敏甚旋里後因家事叢雜割愛詩書功名之念淡然矣性敦厚自奉樸素孝親悌長敬友尊師言必慎視必端其修身飭行固迥超庸流萬萬也由是正直之聲日益噪鄉隣有鬪者戲者公至肅然一時移風易俗其有裨於鄉隣者甚大村中蓄養林山勒石嚴禁值公遠出村人入山侵害公歸而知之皆至而受罰焉此非尊敬而畏服之者乎他如安貧樂道整肅門

庭濟危困解忿爭考其實行有不勝縷述者公孫男有
孚語余曰咸豐乙卯歲四月六日係公易簣之期時年
七十有二前三日偕堂弟永旦孫男有孚往清華朝出
暮歸無倦色越日語諸子曰吾將死矣可爲吾治冥具
人笑而問以日日月忌非吾死期初六可矣問何時曰
未時聞者皆匿笑子三世瑞世珪世琪聞之而懼爲訪
名醫醫來公曰勿需藥能醫病其如命何勸之而後可
精神炯炯動靜間絕無病態初六蚤起檢帳籍置案前
往復披閱屬諸子曰此皆人之負欠於吾者可立焚之
復以持家之道居鄉之義諄諄訓誨不憚煩言時交未

整衣端坐子媳輩及孫男女皆環跪之公垂涕曰吾老
矣死無足痛厥後宜恪遵祖訓毋玷吾清白家風至教
子讀書爲第一要事人之將死其言也善幸誌之勿忘
語畢而沒堂弟永旦適至見公沒悔不早來無何公復
醒拱手辭謝時少長咸集公環顧曰爾等勿以吾死後
竊害林山橫行鄉里自懼重咎聞者皆感激公乃垂淚
而逝是時異香滿室三日後猶或聞之噫異哉若而人
者豈不足傳哉公淑配賀孺人閩範足式多內助居恒
勤儉藜藿自甘御子婦皆有法且饋遺親戚周恤鄉鄰
禮之所當行者無微不至今孫男有孚僮有大志香

探泮水名噪士林雲程正未可量此又明德達人之驗也故約畧述之以傳 同治七年孟冬月

又^{五十九世}永旦公暨金宜人傳

黃寅

公諱永旦字勝金父廷鴻公母金宜人皆好行其德鄉人稱之公自少肩家政事父母能得歡心家庭艱苦之事未嘗委諸兄弟平日治生於外櫛風沐雨備極勞悴自壯至老未敢少休古所云必先盡其人事而後言天命者公之謂已然公秉性剛直立志不苟凡鄉鄰爭訟必多方解息能使強者懾懦者立忠以謀人公以服眾人皆德之其居鄉也必爲一鄉所倚賴凡遇橋梁道路

之事與父老謀因時修理以濟行人不懷私意不炫己
長輿論翕然推重娶金宜人溫惠淑慎內宜其家而外
以成君子之美宜人多子女皆自乳哺一切婚嫁極費
躊躇辛苦艱難備嘗之矣宜人長子邨辰因江族修譜
請傳於寅追述其父母撫育之勞處貧之苦雖菜羹蔬
食亦難常飽而知交借貸未能歸繳耿耿於中歿有餘
憾愚兄弟累年經營幸將夙負清釐而雙親已不及見
言次不覺淚下寅聞其言而歡其孝思之永因以卜將
來之興發未有艾也子九人二四早卒餘均能卓立爲
鄉所重今果大振家聲榮封父母並及於祖父母所謂

爲善無不報而遲速有時傳云不及其身必其子孫余
於江君亦信天道之不爽矣爰叙其梗概而爲之傳

又六十一世巨煥妻葉烈婦傳

黃寅

葉氏霞塢人羅雲江巨煥字文書之妻也葉雖農家女
性幽靜言笑不苟人咸異之年及笄嫁於江未一年適
粵匪寇嫫嫫比清華鄉市寇往來必經而近清華各村
每日或數十賊或數百賊擄掠之頻蹂躪之苦不可勝
言咸豐丙辰八月廿五日突有賊數十至霞塢村葉氏
歸甯在家與一老嫗同避茶叢中爲賊所獲葉氏罵賊
不絕口聲色俱厲賊恨之殺而剖其腹其時老嫗在旁

勸之曰人生世上如輕塵棲弱草耳汝何苦如此葉氏
怫然不顧由是遇害嗟乎葉非生長詩禮之家而天性
貞烈遂足以伸大義而肅綱常以視士夫中游移兩可
而於見危授命之理竟未之聞不亦負朝廷而羞巾幗
也哉今其族人修譜而以烈婦之節畧示余余因爲之
傳他日修邑乘者必將採之以入於烈女之篇而一時
千載之名正於此見之非僅於譜牒傳也茲不過述其
遇害之始末云爾

水路五十七世之訊公傳

閩柘浦人孫起緒

先生諱之訊字廷問又字有書婺源北鄉旋溪人幼好

學讀書比長不樂仕進然才具開拓與兄羽和先生相埒鄉人有一難之目居久之遊京口有吳公者見其磊落不羈器重之因妻以女會承慈命尋長兄爾毅先生於三楚黔司林聞其名親聘入幕公事之暇恆睠睠以愛民相勗以故黔民罪非殊死先生多爲平反黔本八番故墟宵小恒乘間竊發黔司每一處置賊即授首大憲以爲林功不知皆先生用間出奇之力留黔九年後因祖塋被侵家書促歸黔地官民祖帳填路未嘗不揮涕而望其再來也及歸里於水源木本之事無不竭誠扶植後年六旬來閩中樂武彝九曲之勝裝千金經營

崇邑紙戶全負之先生置若罔聞人有以逋追相促者
先生曰彼良未喪行當歸趙如真貧促之何益其胸懷
曠達多類此辛未歲緒於張孝乾前輩處識公玉貌清
古步履矍鑠聆其議論知爲有道長者因延至家以師
禮接之析疑問難獲益非一先君棄世停柩有年先生
爲擇吉以葬顧性厭煩冗有以卜地晉謁者常謝不見
或不期而晤則以地學不易對居常染翰自遣每遇抑
鬱牢騷輒激昂慷慨發爲詩歌流播遠近無何復返京
口囊橐蕭然晏如也年七十五以壽終緒初聞訃不勝
悽愴後一年得晤令嗣道滋世兄因留寓閩貿易世兄

性倜儻亦通書翰爲善者必昌後誠哉迴憶款留草舍
風雨親炙時忍忽十餘載矣茲先生之姪其清緘至世
兄所查先生歿葬登譜緒不揣愚昧敬書一二用致人
琴之感云 乾隆丙戌余月望日

又六十世和桂公贊

洪 庠 彭澤人

贊曰側聞是翁名曰和桂字以月中無鄙俗態秉直諒
衷其奉親也孝其事長也恭其行己也直其待人也忠
雖曰未學有是四者亦奚愧於君子之持躬昔在司馬
溫公自言吾生平無事不可對人言差自信於私悰夫
何遙遙數百載得先生而與之同予固未見其儀容而

聞其懿軌緬厥高踪何妨於景仰之暇代稗官紀載以
俟太史氏之采風 嘉慶己卯夏月

又六十世和棠公傳

張未堂

古人以庸德自勉後人以奇行矯情其可傳者同而其
用心則異也吾觀近日邑乘所載多奇節畸行其果能
皆有實德而皆可傳者耶吾太親翁江君諱和棠字郁
華號思齋起宿公次子也翁幼時家貧隨人樵牧稍長
則奔走吳楚服賈興家父沒養母益豐其自外歸必親
省祖墓偶有毀壞卽修之未嘗歛及眾費凡里人爭訟
必代解紛苟能濟事雖於己有損不計也其他提攜親

戚賑貸友朋善則成之急則救之毫無德色此皆翁之庸德雖無足驚異而自有卓然可傳者張太守贈額天倪純粹配黃孺人內則素嫻翁有善舉孺人必贊成之子耀東能守先業善必有後信然 嘉慶戊寅秋

又六十全焯公暨配洪孺人傳

庠生鄭甫臣

先生諱全焯字見南號午峯江仲魯公之長孫和桂公之冢嗣也性樸厚襁褓中已失怙恃育於祖母吳太孺人甫弱冠卽卓志自立槩然曰大丈夫立世非席先人舊業揚眉詩書亦當牽車服賈創業興宗方不愧爲男子於是奔走吳楚經營立業漸致豐裕生平慷慨正直

遇同鄉困於逆旅者傾囊飲之其橫逆不馴者正言折
之直諒之聲嘖嘖人口至於修理祖墓賙恤鄰里和協
宗親皆能人所不能惜德優壽促年四十而沒未竟厥
志德配洪孺人素諳婦道聞先生病奔赴金陵百計醫
治無效先生歿一慟幾絕念遺孤尙幼矢志撫孤成立
以母道兼父道方諸仇湛之賢庶無愧焉江西彭澤大
司成張公錦枝贈額曰節媿共姜明德之後必有達人
以先生之德孺人之貞如是佇見蘭桂爭榮天之報施
必無或爽已 嘉慶戊寅秋

又六十紹燉妻盧孺人刲股傳

余馨

孝庸德也非奇而難者也吾觀內則立閨門之範子事
父母婦事舅姑各修雞鳴之職而已無所爲奇難者誠
以君子不責人以難而以庸者示天下人得以盡爲焉
然則孝非不貴難謂夫難則人畏於爲耳世傳割股一
事予聞其說未見其人而不意得之於盧孺人夫人之
肌膚父母之肌膚也割股療疾直以父母之肉飼父母
不有玷於全授全歸之義乎故君子不多於士大夫之
能此而未始不多於女人之能此者何則女子內夫家
外母家也旣嫁於父母有絕義故遇翁姑疾劇一點誠
心不怖刀鋸能割股以進初無有髮膚毀傷之嫌而實

能於庸德中傳爲竒節著爲難事是亦足爲閩內光矣
盧孺人系本黟縣從父僑居江北海陵歸吾邑北鄉旋
溪江松溪公爲繼配婦德沖和肅然耿介奉舅姑以孝
而高堂爲之霽顏相夫子以順而琴瑟爲之靜好生丈
夫子四女三撫前室子女如所生當其隨丈夫金陵歸
未習家鄉田舍間事每事必請於姑甚得婦道事姑克
孝遇病衣不解帶小心服勤累夕不寐姑病甚遂割股
噫此何如事人所不能爲者而孺人優爲之哉是祇知
有姑不知有身也是祇知有姑之疾不知有身之痛也
是祇知救姑之疾增母家之光而不知有生母之遺也

嗟乎孝不出於峩冠博帶而出於荆釵布裙難矣不出
於寒溫暑扇之末節而出于剝膚剜肉之慘觀又難矣
不出於鼎族華門通經博史之男兒而出於賈室商家
縫紉補綴之女子抑更難矣而孺人不以爲難者滿腔
血性發於不覺雖赴湯蹈火有所不辭是在剛克之男
子無不縮首而却步者而孺人行之若素嗚呼奇矣及
送舅姑歸山後喪葬盡誠盡禮復隨松溪翁於建業松
溪翁爲人質直無欺僞語無機械心雖在閩闖有儒士
風生意遂至中落孺人勤女紅以佐經營者歷有年所
婦職之嫻誠有不勝覩縷以述者也後以子力得恢復

舊業光大前人而孺人之溫恭敬戒仍無間於初終焉
前知縣楊公贈額孝慈壺範真所謂名實相副者矣
同治丁卯十二月

椿源

五十六世

丹士正月公傳

元孫

和梓

正月公字以明吾高祖也吾祖嘗語吾曰正月公丹士
也少讀書過目不忘師放膳輟密採柏子以食漸至松
脂芝菊之類有助於丹術者皆嗜之迨教授於村塾課
餘則跌坐運氣或讀梵書爲偈語積久漸知未來事與
人言皆隱語莫喻其旨每午後出遊或過夜或二三日
不歸不饑不倦或宿深崖木杪無險畏遂以爲常人益

以狂目之康熙癸亥七夕忽題偈於案曰滿天皆星斗
遍地俱萬物星斗運天機萬物盈地軸七月七日書遂
棄家人長往不知所終今子孫以七夕之期爲祭祀焉
噫公少餌丹汞習導引則學仙矣其宿崖木杪虎豹魑
魅不敢犯則得仙矣繹其偈是等乾坤星物於無窮盡
也其雲遊不知所終者則遇仙可知已 嘉慶己卯夏

橫路五十世兆樑公傳

附貢生

韓濟

翁諱兆樑字萬川祖無遺業幼習鍼工自揣村內傭生
縱能免飢寒終株守困窮不能自振乃徑往金陵淹留
旅邸幸有友提携引入俞宅德隆號居住以晝夜不遑

之勤一介不取之節宿諾不留之信見重於俞宅而收
用焉越年餘信任深而遂畀以大權凡貲財出入無不
爲翁所統理自此而附生意設鄉行數年之間遂漸發
蹟擴增良田兩創華屋援例納粟得從九品銜子太學
生向使囿於管見狃於目前之便而屈抑在家雖日昃
不遑不過給家人饗殮而已翁始志非小發蹟迺大知
有志者事竟成也然非翁之篤實則謀趁於通都大邑
者實繁有徒榮歸者百不獲一大畜之象曰篤實輝光
日新其德可見篤實爲進德之功亦工商之要誼尤彼
蒼之所眷顧也翁大令嗣諱鳳煉字丹成生子未育而

身早歿次令嗣印鳳煥字振聲現已三男當劫運流行
人遭屠戮而翁令閩俞氏孺人以壽令終子孫蕃衍無
恙者非翁之篤實所以邀天佑哉 同治戊辰夏

石嶺

五十
九世

廷福公配潘節傳

以下錄石嶺譜

吳士崢

賦春人

孺人系出邑北桃溪望族年十四于歸邑西石嶺江門
爲故處士廷福公德配年十六生子芳布十七夫故時
芳布僅半歲孺人哀慟幾不欲生轉念姑在堂兒在抱
上不能事姑終天年下不能撫孤成立徒死無益乃脫
簪珥誓節長素惟姑是依以撫遺孤未幾姑亦卽世葬
祭如禮孺人影隻形單夫叔利其家資欲奪而嫁之孺

人以其情告親族親族重孺人之節而憐孺人之遇也
謂孺人曰勿怖事至汝奔號於外可也於是氣益壯乃
將內外衣服紉針縫綴引刀自衛厲聲曰吾夫嗣續在
此孤孤之存亡在於吾身去留吾去孤不可保吾夫之
祀隕矣如有利吾財奪吾志者以一死決之夜不就寢
坐以待旦如是者累日夫叔偵知孺人之節烈奸謀遂
寢孺人以一婦人能使其夫叔畏憚而不敢萌異志此
即曾子所謂可以託六尺之孤臨大節而不可奪者後
孺人課孤讀身勤紡績聿新堂構聘媳吳氏家道日裕
是足以慰夫地下矣孺人年五秩邑侯郭公贈額曰節

勁松筠年六秩芳布以母之節孝呈縣達部 恩准旌
表給銀建坊縉紳先生爭爲詩文頌之無何孺人年六
十四芳布又歿布子賢城年十三孺人又撫孤孫成立
豈天以孺人之貞且賢故阨其遇以難之耶茲江族修
譜囑余爲傳余以孺人之節孝可以厚風俗正人心維
綱常名教於不敝者故樂爲之傳 乾隆甲申仲夏

又五十九世芳桂公百歲建坊傳

賜進士准安府教授齊康

公諱芳桂字子攀號懷古姓江氏世居婺西虎溪代有
聞人公以農隱於家漸以饒裕其課孫子或耕或讀餘
如創修祖廟周恤貧乏善行不勝枚舉優游里閭以養

天年乾隆四十七年年將百歲孫子輩援例請旌由
縣申詳以達禮部奉旨建坊表曰昇平人瑞固聖
世之殊恩亦公碩德洪福有以致之也後一百二歲壽
終娶李生子四賢合賢旦賢盤賢蘭孫十餘人曾孫十
餘人元孫十餘人將來大振家聲未可量也 嘉慶己
卯仲夏月

又五十
七世芳布公傳

吳士崢

先生諱芳布字聖韋號守朴半週失怙母潘孺人守節
撫育成立九歲就外傅性聰敏能詩文通經史至孝誦
詩至蓼莪以不逮事父爲恨环不忍終篇念母劬勞常依

膝下母年六十爲請旌表後精岐黃術用以濟世又嘗捐貲賙恤樂善好施年四十八病弗治歎曰吾不逮事父又不獲事母以終天年死豈瞑目易簣時屢囑其子善事王母且以未服母喪遺言齊衰入殮嗚呼先生之純孝至死猶如此其摯也配吳氏生子賢城字如經習舉子業余聞源之遠者流必長根之深者葉必茂竚見扶搖而上表繼瀧岡庶幾顯揚先德以慰九原也

乾隆甲申季月

又

五十八世

賢城公配戴孺人節傳

王曜南

道光丁酉婺源庠生江君其川以其先世節烈徵詩文

並以狀屬曜南爲之傳按狀高曾祖妣皆孀皆服義皆撫孤節傳三代其川高祖妣潘太孺人同邑桃溪里人年四十歸其川高祖靜齋公十七而寡孤甫半齡誓節撫之成立是爲其川曾祖守樸公性孝謹乾隆十年以其母潘太孺人事實上聞得旨旌表守樸公年四十八歿配吳孺人同邑賦春里人於是姑婦並寡有孤年十三吳孺人與其姑又撫之成立是爲其川祖父芝泉公公儒者能以醫濟人年二十七又歿配戴孺人同邑長溪里人年二十八又誓節撫其三孤三孤者元鏡元銘元鈴鈴其川父也道光己丑以戴孺人事實聞於

朝於是江門再旌教授徐公贈額曰孝節揚芳庚寅
九月卒年八十六光道丁酉仲冬

又六十世廣洛公傳

族再姪

邦作

公册名漢字蔭淦號荆川幼聰敏力學本經籍爲文章
力掃陳言顧鄉試屢薦未售以青衿終此亦命之無如
何也然公至老手不釋卷不以功名爲急惟孝友一堂
和睦族黨父母之前問安視膳竭盡子職鄉鄰嘖嘖稱
之鄉黨間見尊長者必加敬禮不以賢智先人其待弟
與子姪也則又勸勉之以善行使勿怠道光乙巳修養
和堂支譜公竭盡心力精審詳備生四子巨勲巨川巨

卿巨鰲年五十六卒惜未竟厥施也
光緒丁酉秋

澄源內門

世五十

晚同公傳

以下錄澄坑譜

錢

異

晴汝

先生江氏名曜字東陽隱澄源山中七十年矣言實而
行純衣布而食淡語人曰昔公儀子辭不踰則履不出
位吾師之以言行焉魏野不棄敝布不恥葺袍不慕絲
繡吾師之以衣焉東坡一爵一肉以安分以寬胃以省
費吾師之以食焉故自號樸菴先生九歲喪父既又喪
母二兄皆長有成業矣先生能自樹立不競爲世行卒
益充拓以底於成自小從鄉先生治經輒知經讀子史
輒記子史學詩輒能詩暇時取陰陽星卜書讀之輒又

熟陰陽星卜既冠則縉紳家子弟已爭師之矣先生之
教重孝弟本忠信正句讀開疑難嚴課約蓋自其始冠
而老教於其鄉者幾五十年鄉之具材藝有士行者多
先生弟子故至今稱篤行耽學能表率後進者必首先
生云先生談星學尤精絕疾病婚媾問者日踵其門先
生論生死休咎無兩言乃生者死者休者咎者卒如其
所論也他陰陽星卜多挾術詭言借富貴聲勢以自高
以罔大利及與先生遇則唯唯不能出一語卒亦慚服
不敢留於其鄉先生壯年遊楚楚之人與語知爲先生
也驚曰吾謂先生耄矣而乃壯年蓋以其譽久而遠也

先生妻李孺人性端懿以敬事先生以勤儉佐家而又
知書先生訓童子於家童子讀書或誤也李聞之輒曰
誤矣或遺字句也輒又曰遺字句矣其敏慧有識如此
子二創祐挺祐先生以其學教之卽能宏其學師於其
鄉也人咸謂先生有令妻子云旣而挺卒李亦卒先生
復娶於吳吳之敬事儉勤皆如李創又能孝養故先生
日猶抱膝吟或與其孫遊田間也

晴沙錢氏曰先生於予先夫人爲舅弟先考東亭公於
人少許可獨雅敬先生予嘗與大夫士論當世遺逸蓋
未嘗無先生之名亦未嘗不歛讜稱賢於戲孰謂山林

闇樸自修之夫不得與峩冠飛纓聲氣赫霍者並名耶
嘉慶庚子九月既望

又^{五十}瑄祐公傳

葉文鼎^{筆溪}

澹然子名瑄祐字廷器世爲澄源江氏族望嘗學詩於
憲副胡藻潭菟隱摘微弗局局常軌人曰是殆望澄源
者也幼失怙恃伯兄乘筏淮陽客死建康旅櫬千里劬
毖歸之既而弟若兄子少未練事且官私之費弗資力
支罄矣乃出己蓄罔吝毛舉髮拾內外賴以弗墜坐是
廢舉業人咸惜之然已施於有政訓家人曰必有忍其
乃有濟閨壺肅清軌物可馮咸底化焉婢妾小干紀嚴

屏之無難色曰亂生自婦人姑息將爲梗也是故萃爨
數十指數十年無間言性好獎拔晚進每遴貧族敏小
貲教克立者若干人維時大姓爭延範塾休陽長沙太
守李仕翺宰婺時賢之聘掌社學兩川吳公聘如之雖
咸未赴而在社者胥飭曰若毋貽江子之羞乎是所學
刑于家錫類薰於鄉以廣於兩邑者如此尤耻吹洗人
過舉語言恂恂若不出口予三十年交未嘗見其叱聲
怒色了無玩好惟雅愛吟咏日課一題七必有警句如
時雨曰病稼回青色農家熟黑甜自遣曰平地須防塹
陰天定得晴其憂世檢身以俟命他可類推此澹然子

之所以澹也交有名世雲莊葉大參礪齋其同窗按察
程礪峯其同庚雅不以窮達冷熱鐘山晴沙錢子一時
豪儁亦嘗經厥指授予則愛其型範諸人咸稱曰南峯
南峯其別號也晚年樓居高峩山下竟日歛膝把玩子
史若將終焉他如養蔭址之木新杠曰流芳創石虹曰
會秀仍貫鼎制利物時觀予近年兩造其盧盧眼見其規
畫更詳皆可傳也 贊曰淡之爲義蓋取諸水喻性者
旨焉元酒之尙菜根之斷江子將有意乎故率真任質
不事表暴以成化於家是非嚼蠟而白談者苟合氣於
寂寞無爲而漆園吏與泊相遭弗可收拾如瞿曇者流

則淡亦荒矣哉抱遺子曰松直弗礩玉白弗澡繩引石
攻良工苦心江子其善澹也耶

又^{五十}漆祐公傳

余

鉞

石峯

耕樂子之隱澄源蓋老矣澄源在秣陵山中土腴而水
清俗仁而風厚無市巷侈異之習無爭奪之亂故其人
敦儒而重農或曰樊遲之學稼圃聖人無取焉子顧樂
於耕耶耕樂子曰不然聖賢之學有經世之責者也吾
奚敢望若夫君子之學莫先於適志志適矣則簣也篠
也釣也魚鹽也割烹也猶將樂之而况於耕乎况於吾
乎是故耕樂以適志也且吾常耕於野矣始過焉苗之

芄芄然者若孺子之起而欲立也再過焉薺七然者若
成人之愿而欲進也三過焉若壯夫之材而欲試也是
故樂之不可以已也而况食芹則思君啜菽則思親烹
葵則思祀先釋菜則思事師入稼則思向善去草則思
棄惡皆耕之取也是故吾樂之不可以已也石峯子聞
之曰吁善哉吾於耕樂得忠敬之學雖聖人以之語樊
遲可也耕樂子姓江名漆祐字廷材性質實無私忌少
孤愛其弟不忍分異教其子爲鄉族子弟師弟之子喪
其母自爲漿乳之卒以長成蓋力善而隱於耕者也
明嘉靖己亥秋九月

又五世天倫公暨配潘孺人像贊

外孫施用炳

翁字明五澄源隱君子家非饒裕而好善樂施孺人生

五子壽躋耄耄兩沐皇恩謂非盛德之所致歟

贊曰澄源望族代有偉人太翁繼起品行彌珍賢哉淑

配內助殷勤德垂後裔子孫振振炳生也晚未獲覩翁

之道貌聆翁之德音亦惟對斯像也肅然起敬儼乎如

見而愾乎如聞 乾隆四十二年冬

又五世起銅公傳

禮部左侍郎金德瑛

江君名起銅字鑑如敬齋其號也婺西有地曰澄源土

沃泉清風俗醅厚鑿如世居焉兄弟五人長起金四起

鐵五起鎮仲兄起銀以姍戚而出紹於邑之侯氏鑑如
行三性篤友愛雖仲兄所居異地時欲與敘濶悰田家
荆樹姜被同眠殆不是過先是祖父遭兵燹兩火其居
嚴君又復早世備厯憂危賴節母張孺人鬢髻挈提家
不墜鑑如曰吾兄弟丁此困難可不卓然自立以恢宏
舊德乎由是奮志經營家道日隆隆起喜五弟鎮有慧
質命之就塾尊師重道養教兼施又以爲君子將營宮
室宗廟爲先走告仲兄大加贊賞相與拓地庀材以妥
先靈越一載而工竣邑侯陳君士元顏曰孝友堂嗚呼
士人窮年寂守藐無一就者所在多有鑑如起白艱難

卒能興創此豈易也哉年臻七十既壽而康子兆柔兆
浚謹守先型而孫曾迭起英英拔萃洵稱德福兼隆彌
留之際他不遑及惟殷殷以承先裕後講讓敦仁爲子
孫弟姪訓易曰敬慎不敗鑑如有焉生平束身軌物終
日乾七因自號曰敬齋敬之一字殆鑑如之所成始而
成終者爰傳其大畧異日太史採風闡發幽光潛德聊
以余言爲左券云 乾隆己卯春

又^{五十}兆察公配吳孺人節傳

^姪興荷

孺人係出賦春吳宏諒翁女吾從伯兆察公淑配也有
賢德二姪幼失怙恃收養一家丙戌冬察伯病歿孺人

年二十八家無餘貲撫二孤並兩姪成立洵苦節也因
傳之曰黃山白嶽聚星宿之精英青女素娥得坤輿之
正氣矢丹心於一寸血淚全枯報白骨於九原神魂不
顧燕常繫縷蝠祇倒懸慨實命之不猶匪偷生而聊緩
亦謂勉之大義須教孤匿程嬰曉以至情應念孩生李
密况繼姑堂上侍養何人弱子膝前啼飢靡所蓮有苦
心之的梅無點額之花爭日月於簾幃素心可質潔冰
霜於裙布清操誰倫詎爲殉名而能守義乃知蠅不能
玷斯歸白璧以完兔可成輝任破青銅之半爰是清芬
光於邑乘斯宜 寵錫待自 朝章邑侯趙公額贈閨

漳師表斯亦榮已
嘉慶戊申八月

澄源外門五十世貴旻公配錢孺人節傳

錢

異

晴沙

節婦鍾山人錢晴沙子娣也幼慧而材父母及諸伯叔
父母咸愛之曰使是為男子不與吾家乎年十八歸江
君慎菴慎菴吾外舅草塘公弟也性慧巧好畜書畫知
音樂然故患風疾一發輒不省人事節婦無怨言事之
謹慎菴或近出必伺之與之俱一日獨出稍久求之則
既死水中矣節婦號慟將入水從之或勸之曰汝今二
十五齡耳奈何即死就死已獨不念慎菴三歲兒耶節
婦悟強起治喪葬事三年或又諷之嫁節婦堅苦以明

亡志人咸稱之爲貞白節婦云草塘公豪宕出入飾裘
馬喜交豪客客至輒治具竟日夕不止節婦與吳外母
汪瞿瞿辦酒食懼無以當公意公亦加禮節婦事有難
處分者間使人問之節婦輒能裁白又罔不合禮無何
公亦卒男子皆細弱節婦能支內外事外母性利柔無
忌忤故卒能相成以無墜厥家外母子女四人節婦抱
育之又婚嫁之子女咸不知母注而母節婦節婦亦忘
其爲汪子女也嘉靖丙申歲節婦年六十八以疾卒外
母哭曰天乎胡使予同生不使予同死耶四子女咸哭
曰天乎予有二母乃不獲同養以死耶節婦居常勤女

工聚米粟豢雞豕以裕家御子婦有法雖長稍有過輒鞭笞之訓諸孫必使業儒治生事故其子鑣慷慨知時事敢樸力善以能成立孫榮燁皆謹飭有守榮尤好學爲鄉子弟師

贊曰從容就義古謂之難矣而况明其志永信合親以不毀也夫傷激者或違誼持獨者多廢公故女婦之烈或死其夫矣不死則有其子也有其子則或私其子矣私其子則踈踈而親親甯無嫌隙哉乃節婦之死也其伯姒欲與俱死諸子女又咸傷其死此豈聲音笑貌所能致耶於戲是可以觀節婦矣

嘉靖庚子九月

又

五十六世

良盒公同弟良盒公傳

舉人齊之禮

翁諱良盒字和先號雙元澄源人也弟諱良盒字敬先號慎元幼居貧兄弟力作以供衣食非分所有不苟取既而家業駸駸起囊有長物時濟人緩急遇鄉鄰義舉輒輸資助之讀書粗知字義天性所發有非通儒所能及者事親以孝且推其孝於祖先父歿卜兆於盤坑塘下形家以爲吉翁謂弟曰地果發福何妨共享乃遷其祖與父合藏伯仲之間友愛備至至於白首從無間言翁有子未育慎元公勸置副室翁曰汝子猶吾子也長姪有梅聰穎異於常兒翁鍾愛之慎元公體翁意以梅

承其後兄弟暮年嘗相謂曰吾兩人同氣同心今且老矣猶喜同爨未嘗一日離過此以往能無先後存歿之異乎斯言也雖屬一時相對之常實起百歲同歸之感其後慎元公卒於康熙己亥二月十九日翁則於四月二十三日相繼歿此有命定抑亦友愛之精誠所結而致歟孺人皆吳姓翁配賦春人慎元公配上田人貞靜淑慎妯娌雍和勤儉以持家惠溫以待眾均稱賢助年壽皆近耄耄余家狝麓距翁居十里年來翁孫永炘又聘吾女情好日密故翁與慎元公之素履知之頗悉爰次其大畧垂之譜牒以傳於後云
乾隆丙戌孟冬

又五十七世有梅公傳

張嗣輝

翁諱有梅字元魁號庾峯翁父良盒伯父良盒皆以孝友稱翁昆季四人行居長生而岐嶷伯父深器之嘗曰大吾門者此子也已而伯父無子遂以翁嗣既長嶄然見頭角輒思開拓前基振興鄉里親師取友往來皆一時名雋攻舉子業出入古大家書法得晉唐人意其居家也修庸行紹貽謀家政鉅細以身肩之而條畫悉當與人交即之溫如不為崖岸之行及嘗試之又介然難犯凡建議不決翁為之裁斷渙然冰釋遠近咸慕其為人以大器待之使天假以永齡則家門內外之事其所

勃發固未有涯也惜乎年未及壯而死死且無子孱然
一女在室嗚呼身嗣人後而及身復無後是不可解也
念翁嘗爲伯父所鍾愛而又承其後因卜墓汪萬坦附
伯父之墓以慰兩世于地下情也亦禮也自翁之歿十
八載女及笄而歸予予不及見翁也翁之女雖嘗見之
而亦不知翁之梗概比長聞于家人傳於里閭所縷述
者如是而後翁之行實乃時時齒於吾家最後瞻拜翁
墓見墓石所誌揆藻摛詞與傳聞者無異乃歎翁當日
負長才而賚志早逝能使親戚交遊歛歔泣下鐫勒掄
揚死者有知或亦可瞑目也乎旣又念誌於石者石有

時而磨不如傳之譜牒可以闡幽光而垂不朽乃者江氏之譜將告竣矣謹次其實錄光諸梨棗是余之責也夫乾隆三十一年冬月

又^{五十}有梧公同子永斨公傳

庚吉士齊彥槐梅麓

公諱有梧字鳳儀讀書應童試因家累廢學少孤事母撫弟無間言嘗續修宗譜立祖先祭祀建祠廟凡尊祖敬宗之事均力任經理不惜勞費有單傳難婚者助金成之祖墓失考者查譜勘驗立碑蓄蔭以識之又念歲歉饑困而創設義倉念賦役煩苛排費無出而歛勛穀生殖立宗裕戶以資補助與夫文廟學宮皆捐貲邑侯

唐禮以賓筵贈額曰松齡玉質教諭王贈額曰東序耆
英子永斫册名承恩貢生好施樂善綽有父風嘗夢神
人示詩曰八义坵山爾卜夕成勻土兮光宗宅水源木
本當思厯荒賁土兮渺竭覓雲山高兮獅山迹河水長
兮淄水脉將詩詳釋乃三十一世祖宋尙書灃公示也
時灃公墓荒祭替因集近宗歛資生殖然後墳墓得修
祭祀得立永斫公之子世填有大志年四十一卒填子
二長曰大森邑庠生次榮森邑武庠生大森譜名宗錦
另有傳榮森譜名宗銳撫孤姪如己子恤貧扶弱繕治
祠宇鄉人至今稱之 嘉慶己卯夏月

又五十八世永煌公暨吳孺人合傳序生載文魁

公字元敬號謹亭家居澄源父有棧公世守儒業不幸
早卒公資稟穎異嗜形家書耽山玩水寢食其中今子
孫蕃衍皆其葬祖卜吉所致也公家素非優裕有義舉
不惜捐金值歉歲獨爲平糶他如敬宗裕後祀田祭產
義倉等事皆經畫久遠無何嬰病不起生於乾隆三年
十月初二子時歿於四十三年六月初二戌時享年四
十一配吳孺人淑慎溫恭持家撫子邑侯丁贈額曰婺
煥懷清子三人孫十三人林林總總俱已成立人謂積
善之報云 嘉慶己卯孟夏月

又五十九世世堙公傳

孫巨漲

先王父爲曾祖炳公第三子生而岐嶷幼與叔祖孝友無間弱冠往浮南下里村就竹木生理數十年間稍獲微利家道畧殷實高堂甘旨罔缺得其歡心生事死塋一一如禮後兄弟析爨有無相通處宗族必誠必信戚友貧乏者必爲之經理區畫雖勞瘁勿辭喜與文人學士遊又愛遊山水恒以妥先靈爲務非僅慕佳城也居鄉排難解紛眾皆悅服又課子義方先嚴與叔父悉遵庭訓性慷慨好施予聞有橋路寺觀種種善舉必量力捐輸綜理眾務井井有條積濟倉積而能散荒而能備

與同事諸前輩任勞任怨尤爲一生精神所在嘗與鏘
叔談論俱治家格言命孫輩宜則倣之予以丁卯科補
行乙丑入郡庠往謁戴象書先生先生曰令祖澄源偉
丈夫實我婆隱君子也先生不輕許人其必有見矣王
父朔望必入境主廟致敬清明冬至墳墓祭掃必親一
生善行不勝書特以所聞見者表而傳之示不敢誣也

又^{六十}宗錦公行述

男巨淦

父諱宗錦字綱文册名大森晝堂其號也生而穎悟七
歲入小學師甚器之九歲能詩族伯父瞽者以子平爲
業囑對曰雙目無瞳能命算答云一心有孔便通文伯

父嘆曰是兒異日當可造先祖父又嘗出一對句以觀其志曰家非積善不生聰慧之兒父對曰身若成名必做清廉之吏先祖父喜形於色十二能文章十三邑試便列前茅十六考取佾生恨不早成名以酬先祖父之志於是發憤忘食廢寢弱冠入邑庠甲戌鄉試同考官李公薦卷未售後丙子鄉試歸遂卒時年三十一嗚呼其數耶其命耶其吾家之氣運耶不肖興言及此不知泣涕之何從也若夫人品行實有鄉人之口碑在不肖惡敢贅 道光戊申孟夏月

又^{六十}宗鑑公行畧

恩貢生 吳憲揚

公冊名恒號文毅祖澄源而家賦春者也兄弟三人父
母獨鍾愛公公亦獨能孝養父嘗有所需公知之潛貸
諸人以進之公不之告父亦不之知也父造三子所居
之屋不足公傾囊成之不計直亦不居其屋母老晨昏
定省一切加衣進食皆獨任不遺餘力迄父母沒哀毀
逾禮凡附于身附于棺者不與兄弟較信乎公能竭力
以事親也生平恨少讀書遇讀書人必加敬禮始教子
漢惜年不永不果繼教姪濬爲嫂所撓又不果又遍教
姪輩十數人俱不能讀終不果晚乃教次子藩倍加篤
志常誡藩曰讀書者學爲聖賢非圖富貴也須識聖賢

之心毋存富貴之想後藩入泮公亦無喜色曰一冠一
帶直百金事耳吾教兒讀豈爲此區區耶其處鄉黨也
事所已知者無不爲事所經爲者無不盡心某遇人命
事公力解之某與大訟公調息之某遭回祿公力救之
又捐資助之迄今里中婦孺輩皆嘖嘖曰某之命非公
莫全也某之產非公莫保也他如在澄源捐重資以修
祖廟竭心力以建宗祠在賦春捐書屋接龍山輸賑濟
興文會倡修徽饒大路後因費絀幾至束手或勸再賈
公曰一誤不可再誤或誘以外利公曰餓死事小失節
事大晚乃設帳里門口講指畫倍於常師或勸稍節公

曰吾亦知勞且苦但必如是而吾心安不如是吾心不安也予聞之人云村外修大路公以其子鬻薪錢八百輸於眾眾却之不許又有江西某餓於旅舍公以其妻賣雞蛋錢二百助之行竟不識其姓氏予聞之爲之一笑且爲之一哭云公生於乾隆乙未年四十援例入太學年七十沐恩賜粟帛歿於道光乙巳享年七十一含笑而逝遺囑附葬祖父永厝公墓左娶臧氏孺人事姑孝相夫敬持身儉教子嚴年四十五歿繼娶鄆氏亦聰明而有志子六漢藩簿泔洛源漢性至孝且善讀年十六卒公甚惜之藩自少見頭角長益知名惜爲境所

困然年尙富强一衿應不足以限之源年少亦善讀書
或謂公之昌後正未可量也 道光戊申仲夏月

又^{六十}世宗鏐公傳

族姪
淦

蓋聞處簞瓢之空見道彌尊出金石之聲好學彌篤以
故蘭馨桂馥郁郁者詩書柏翠松青雍雍者禮樂草堂
玩月精神爽於暮年竹屋吟風意氣深於愛子曰稽伯
父鄉飲介賓諱宗鏐字養全固耄年足式碩德難忘者
也遵東魯雅言教兒執禮凜西京明詔裕後力田更傳
曆象之書星辰不忒又習堪輿之術山水雅遊遐邇欽
遲道太邱之盛德親疏仰慕望三仲之高風况乎氣若

汪洋人如岳立不事雕飾廉泉讓水之間素行端方秋
菊春蘭之列采芹采藻卽君泮水以遨遊夢熊夢羆孫
曾大人而叶吉婚嫁已畢遊嶽恰似向平蓬島相邀登
樓渾如李賀不必寄恨於南浦壽永足多何須移檄於
北山名高真重迄今緬想儀範偕澄水以長流追念典
型邠高山而宛在敢忘秉筆請事留題 贊曰貧也非
病惟貧然後見君子嗚呼信然矣 光緒己卯秋

又^{六十}世宗銘公夫婦合傳

汪顯邦

公太學生册名子聲字倣五先世遺薄田一畝且負債
公以勞儉起家里中有飢寒者周恤之急難者拯救之

爭訟者婉言排解之無何德邵者年不高五旬有九卒
子方免懷賴戴孺人撫養幸而孺人名門大族性賢淑
教養成立無何鄰居鬪牆起釁孺人避居之不料所避
之居同室者與人構訟孺人又慮池魚殃及再移居於
祖祠祠非托足之所復徙他室流離辛苦已可想見而
且燃松脂於午夜補綻忘勞治菜畚於丁年忍饑耐苦
克勤克儉且益田園不誠女中丈夫哉
宣統辛亥冬

又^{六十一世}巨汪公贊

齊振德

無爵而顯勿貴而榮不求不忤吾素吾行北堂養志南
畝躬耕爲兄負笈冀弟成名友愛爲重財產爲輕雖曰

未學大義已明年躋杖國星殞長庚嗚呼公雖死如生

文埜

二十世

澤茂公傳

以下錄太平譜

族人

公名澤茂字如松學步公三子也以耕商立業克勤克
儉家計日裕德配譚孺人未笄而逝繼配林孺人賢內
助也生二子長曰河次曰湘不幸中年逝世公教養諸
孫好禮尚義愛友重宗捐錢三百二十千建香火堂無
吝色又孝事雙親尊敬長上處宗族間患難相恤推食
解衣生平無垢話諍聲排解紛難出一言里人無不敬服
年四十賈遊六安鄉人見公謙和誠慤舉公倡建會館
公欣然不辭告竣後置買義田標列條約使生者死者

皆得其所客歲公由六安回籍率諸孫嘆曰吾老矣諸事悉皆告退而我族兵燹後宗譜散佚夢寐間時以爲念也遂集族眾議重修宗譜眾皆曰此義舉奈資費不足何公欣然願捐貲年八十有六精神矍鑠行不杖坐不歛勞力主事不數月宗譜告成畧述公之大體以爲之傳

光緒五年四月

又^{二十}桂源兄傳

^{族弟}桂亨

兄桂源字馥堂觀九公長子也九公大義過人因胞兄澤森立志讀書早世乏嗣遂將長子桂源兄承繼所以子孝孫賢爾熾爾昌皆公積德之報也兄遵先人遺志

創業成家鄉鄰有急難來告必解囊相助捐田畝以祀宗祖輸財帛以修宗譜皆兄之盛舉也德配崔孺人內助賢良生一子名煥鐘不幸中道逝遺一孫甫十歲聰明伶俐繼配葉孺人持家儉紡績勤孝事翁姑和睦妯娌合室雍容未嘗有一怒言一怒色也因爲之傳而贊美之
光緒五年孟夏

潞江村遠祖祚公傳

（卯峯書樓南齊書祚父德鄰此傳世系恐誤）

失名

潞譜載劉處士

祚公字承歷侍中湛公長子先世自濟之洛爲考城人與弟祐祀同學於郊冉子祐最穎悟祀次之祚公稍遲鈍父弗憚冉曰君無嗔遲毋忙錯鈍毋銳折予玉成之

永慰君心因目曰燕雛贈詩曰鵬鷖搏千里燕雛營一
巢寓棲逸燕翼之意公領悟日誦大易道德逍遙等書
絕意仕進弟祐祀同朝薦於西昌侯侯禮聘云久懷燕
雛之德暉蚤發驪黃之錦轡公復云卧龍止於三分鳳
雛未獲一展燕雛末技恐孺子毀巢指日汶崖營穴等
語因宵遁禹城侯檄益亟祐祀并遣人促行公復弟書
云曲突積薪其焰必烈懸崖投石其碎必粉予將掩耳
泰嶽沐身蓬海防他日震來虩虩焦頭爛額之虞也因
復遁嶧陰或笠蓑漁澤鉏鍤田萊或葫蘆貨藥於登萊
芹莒之區踪跡靡定偶識者呼各地方曳於莒時莒守

卽郊冉也怪問燕雛何爲離巢孔子圍匡文王羈羸今
既投網何施解脫因遣曳者之庾積償以餼署案牘弗
顧公喻意縱步逕去冉領之時號燕領坐堂燕雛入網
署牘作意高飛遠出西昌侯乃詰責冉曰光武握符嚴
子把釣士各有志何苦縈寵亦解組去人復語曰必燕
雛前飛燕領後隨若問踪跡西華南徐永元中禘祀償
事聞訃哀絕復甦策杖反濟葺舊廬訓子元陽稼圃治
生歿年九十四攷公生平資性愿恪承師教指明哲保
身郊冉之啟迪端有自云

黔北江村始遷祖卓公傳

賜進士青
州右司諫謝

泌泉源

卓公字永立世居長樂之宮父德公素志經濟因鄭繁
平章車駕幸華遂絕仕進母太夫人柳氏渝州刺史玘
公妹也以孝弟禮法肅家政卓公承嚴慈訓師事玘公
循準繩飫經史弱冠舉梁震榜進士玘公以次女閨淑
妻之授官博士天祐昭宣禪梁遂杜門憤抑暨聞晉王
奉唐正朔復蜀王書云誓於死生靡敢失節等語公曰
此唐之忠藩也儲殷兵勁剪梁興唐可必乃具啟晉王
勸興師問討晉王婉詞辟召遂依之授尚書郎運籌佐
存勗滅梁勗自立稱後唐乃引休後濟水橫衝廬墓漂
泊嘆曰寰宇廣延樂地無限何苦如此作魚鱉隣豺狼

耶遂告家廟挈家屬遊天目道經繫關見山城環固爲
江浙建康之源沃田可稼平岡可樹遽思投老環視鄉
落得東北仙人塢之南樹館數楹軒豁爽塏遂合券償
緡爲貽謀計匾其庭曰江村逸叟遵唐制也懸柳氏家
訓於壁尊師嚴教誌母慈誨也後有冽泉右有盤石甃
砌築墉結草亭徜徉其中絕跡城市宦轍之宜饒者必
東謁謁則烹鮮傾醅繼以疏黍欣談終日追論禪梁等
事悵然洒別時旱魃爲虐遍野焦赤四民旁皇乃首倡
虔齋詣社稷廢址築壇壝日跽露宿潔熱禱叩霖雨祁
祁遂成豐年因題額曰祈報靈壇東陽郡袁令家素華

奢沍任初豐餽躬謁請益公曰黠野礲确民俗簡陋與
貴地懸絕願侯持儉德四境清安衰朽受賜倍於豐餽
也袁後以善政著名嗜品題不及風光花卉惟憂國憫
農勸學悼節以寫衷懷隣有節婦沒親弔輓云始信柔
腸成勁操可憐馮老是男兒餘皆類此不留稿松徑葛
巾芹溪藜杖髮鶴容癯目炯步健僭童子逍遙四遊里
呼爲人仙享年九十有六瞑然永逝里人祀於社云
論曰當否塞而爲儉德避難之謀局跬步而忽遠覽久
安之策此士之迂慮淺識而蓋臣作祖之道或未聞也
公始捐軀依晉殞梁爲報唐之忠臣以成其終繼遠引

卜居遷黜爲肇祀之賢祖以兆其始遐識深慮迺出尋
常而天鑒精忠後之式昌詎可量哉 宋淳化元年夏

附卓公辭晉回濟陽啟

天象晦而紫微暝地道虧而虞淵涸蹙額悲瞻唐禁奉
身急轉故鄉竊念某庸材遇主超擢甲科蹇運遭時俯
頌禪詔懷子房之椎未試於博浪吞豫讓之炭空泣於
市朝慨率土之同附濁流慕晉藩之獨秉清節一念感
激千里馳驅魚水歡逢虎風思奮數月諮議一旦訃薨
身欲東歸情難西別茲嗣晉世子殿下聰明神授英武
夙成定謀於中帷決勝於上黨冀野表裏山河有俯職

中洲之勢青岱包羅淮海實牽挽舟車之鄉莫伸葵藿
之心難揜梗萍之跡濟陰無復其龍見遼水尚冀於鶴
歸鷓鴣自足願栖故林一枝乳兔多窮便營舊野三窟
寵秩絳錦謹緘在笥劍鉞印篆恪陳在几一併獻納上
方即日歸旋故里疏戇弗恭原宥大幸天祐六年三月

附卓公告廟南遷文

唐天佑九年歲在壬申五月朔濟陽郡五十二世孫卓
謹齋沐告於江祠祖宗之靈遐溯江國肇基在揚再傳
分封開郡充疆周封祀邑禹城之東繼世分遷長樂之
宮祠宇鼎新室家胥寧粲盛維潔玄醴維清歷千七百

瓜瓞綿延輿情守舊安土重遷卓生不辰蹇步遭迤甲
第叨榮濟陰浮沉驅馳晉藩恢復同心閹傳薨哀夾寨
捷音休兵行賞黜貪舉賢因事納忠改轍易絃翩然東
翔掃徑徜徉注目燕趙閔度炎涼轟雷迅雷洪濤震驚
妖魚作災蕩我戶庭載觀先塋驀地圯傾拱木漂泊言
之淚零多岐障孽百折苦魔逆難順受再思若何以龜
以筮南方永安躊躇內謀涓吉庭關展告先祠肺酸汗
烝哽咽難鳴癯孱莫勝宗子承祠祀事任之支子索居
永言孝思奉我府君載車南行一家命脉千里雲程嘿
禱先靈垂祐幽冥晨昏起息以清以甯臨彼封疆胥視

隰原示我室家錫我田園度日積歲蒂固根深根深枝
達其葉蓁蓁敢謂人謀全仗神憐原宥離羣啟佑圖全
尚饗

附唐宰臣楊雲涉寄卓公書

宣猷晉幕竊仰高標斂鍔東臯始獲良晤自幸得朋可
以終老於泉石間資參耆補脾腑毋憂虛耗續聞策駟
閱天耳天目勝槩將探天心眷唐祚爲何如祖道南郊
奚勝惆悵滿擬北旋備談衷縷梁君聞行賈之言述執
事永棲黠土疑信相參令人啖嶧山之薇而哽咽插黍
顛之菜而南望長太息也雖然濟水衝蕩行或使之高

苑纍纍誰洒麥孟猛思亟旋一滴松楸同榻皋牖永醉
蘭菊幸勗

卓公夫人柳氏傳

龍圖閣待制

洪中孚

休陽黃石人

夫人柳姓閨淑名瀘州刺史柳公玘仲女也質清性淡
畧飾而急女紅毋謔言毋惰容率步太夫人歸甯篤愛
執其手曰得佳婦若茲後事永託時卓公從刺史遊受
忠信禮法之教篤信力行刺史嘉之因莞曰允委禽將
筭延母師之最淑者誦內則諸篇及古賢婦懿行細繹
詳說俾知趨向刺史嘗集子弟於堂中申忠信禮法之
訓俾諸女竚後屏與聞但不許操筆硯辨點畫故夫人

諳懿訓不諳文字惟女紅是亟于歸奩從媿家訓一軸
柳夫人命之曰往女家必敬戒盡婦道毋違家訓合巹
太夫人爲具常禮廟見叩曰蘋藻匪躬弗恭先靈原宥
禴烝時祀潔慮祇承及見舅姑娣妯一如禮時宰臣楊
雲涉自充之登便道謁德公敘風雅楊夫人聞聘新婦
召見賜環謂曰新姻孔嘉祠事孔嚴婦道孔嘉敬哉謝
曰夙承姆師慈誨今承老夫人嚴諭敢不敬承楊夫人
曰賢哉江婦其鉅族碩宗漸漬而成淑德也嗣是中務
斬斬御奴惠肅家門雍若卓公登梁震榜進士慶賓噴
噴曰甲第旣登國事艱劇懼夫子羸弱弗克承重增妾

憂領博士睹時事窮蹙顰然笑曰甦鰲角力簇刃呈功
筆硯難與較雌雄孰若斂鋒韜鍔相時展布暨啟晉藩
興師問討承聘歸謀曰夙聞家先大人訓昆弟云子房
擊椎報韓豫讓懷刃報智均屬忠義今當效力報唐之
秋恐晉心事靡常須觀變行止迨退休濟濤暴衝室塋
漂泊公意南遷慮內憚勞曰君先世自楊之克之洛之
濟迄有今日欲貽百世之安敢憚一時之碌碌始告廟
遷黻翔集經始百務叢若唯飾座奉妥先靈是急餘則
徐徐料理用是緩急有倫力不煩而次第就緒附近婦
女趨謁者曲加禮意詢姓名命奴分識雖藍縷亦如之

咸權附獻蔬菓悉量酬緩急則應命華庭之盛飾過訪者接以悃素茗潔食腆問家世則叙柳氏家訓咸異曰不意宦家態度若是鄰有談節婦子紡度歲卽遣老婢致褒遺不時迎食送不踰閼歿則促公輓弔偕壽九十嗣孫班立士夫之疏而賢者觴於庭適梁震門人任葵帥春梁東枉道晉謁酬獻問題其庭曰極婺交輝之庭建炎元年仲夏月

附卓公別墅記

成德節度使

安重榮

癖嗜遊觀轍環列區凡遐深勝槩每借登眺嘗慨河東名園之經營弗若舞雩浴沂之天然也茲公幹江南同

李樞使便謁江君携登庭北高岡草亭數楹左棊書以
適情右几榻以款賓題曰江村別墅粉壁木欄茨墉柴
扉梨床陶器殊協村居風度予探之曰閬然一室兀坐
終日四顧蕭索將何以新耳目而充肺腑君曰勝槩跬
步弗隱弗彰匪異匪常汲一尋之清井厥寒若冰咽之
凜然鑒一鏡之天池洞照吾形毛髮弗忒良友甫臨用
資烹飪攜棋石枰縱橫忘機弄丸毬場中正觀德少倦
歸息香茶一盃繼以蔬果村醅酬酢聽東巖之樵歌北
台之牧笛響應山谷欣欣言旋傲夕陽而入宴寢也旭
日東升漱齒啖饗西瞻三蜀之農歌麥秀而吸稻香南

遊湖丘玩彼淵魚悠悠得所思吾人心跼躓一室油油
然亦猶是也因外形骸順性命幸大造之優容葛巾道
遙不覺歲月之更而年壽之長也予聞公語憮然自失
俛思景象易地皆然造化鋪張鬼神呵護人人得而樂
之與舞雩沂水同一天然也特人懵弗知知弗好好弗
樂唯君道義充溢與天機相遊衍而孚契於真樂耳得
爲聲目遇成色能收爲一亡之獨樂於弗匱也回視河
東名園以人力肖天工而失真者果孰爲勝算哉因載
臨載詠撫景寫懷以寓對時之意云爾

晉天福二年

黔江村

四十世三世

淳萬公傳

秘書郎

方

岳

秋厓

溘萬公字弘一博士尚書郎卓公裔也學究墳典淵識
恢度數竒遂韜晦視世之鉛槧琢句未錘疲力鎔銖計
籌者漠如也遐游歷覽一日艤舟聽慧僧與棹老沂長
江岷蜀夔漢源流愕而訝輦而思曰棹老營飡波濤尙
諳江源吾叨濟陽嫡派自尚書郎以上世系未盡詳覈
視渠增慚迺度淮越徐適泰麓憂秦焰燔烈莽騎躡蹂
無故老壁扃巖鑄以副遐思適天假良緣午庭宗叟發
笥啟緘授受姓封郡因革始夏迄周秦怡然束囊歸輯
世譜復思周世歷秦漢唐間世系闕畧難以承流復訪
宗叟獲歷世縉紳晦逸名實又慮時懸地隔間有遺誤

廼踪跡徧臨淄考城洛潁等區參詳備悉歸輯會譜甫
就芝城宗叟以會譜在坐檢閱公曰先世通顯以忠孝
遺芳文章政事鳴時由師之善教成之予弟淳樸未斲
欲得賢師如柳公之忠信禮法者爲之楷模叟曰吾黨
後學曰萬里號古心忠誠孝友篤於天性博洽勤練當
爲先容公即築室石鼓梵宇之右遣弟一鶚寅簡等投
贄於芝城請焉古心開帷公日督視談本領講時製搜
諸子各有時登眺暢飲亦有時漸漬暇豫而益倍之一
日請事心學毋顛詞章古心曰學一也明忠信孝弟之
理於心體認親切如何見於躬行謂之心學體是理於

君親兄友之交踐履篤實如何自慊於心謂之身教著
是理於尺楮方帛俾後學知孝弟忠信門路而率由之
謂之詞章一也公曰允若茲先生名世之文也古心曰
知心學毋近名公曰使人盡慕名相率爲忠臣孝子弟
弟信友至治可臻古心曰慕名爲善難免粉飾須認理
盡心着實做去國家非之弗顧方是從茲賓主情洽師
友誼密濶祐末予因趙樞密辟之江淮便道歸省遇公
於麓以鄉誼携登石鼓備述前論予噴賞欲筆之古心
君惠論稿謹囊以行越庚戌厥弟一鶚登方逢辰榜進
士謁予懇傳予思公之生平含章蘊嘏奇於遇而綿於

後因據見聞及論稿不惜煩縷書以付之淳祐庚戌夏

柞梓里

五十二世

本焰公百歲傳

侍讀學士

秦大士

翁諱本焰字凌霄世居仙源梓里以順治甲午六月生
乾隆乙亥十一月卒潛德弗耀隱於農畝事二親備極
孝養隆冬盛暑侍膳問寢至老不倦沒後哀戚祭塋盡
禮二難競爽式好無尤有田荆姜被之風訓子義方詒
孫燕翼自輸國課外足跡未履公庭家貧力穡宅心慈
祥施恩桑梓窮民受解推之仁修築橋梁行人免徒涉
之苦乾隆甲戌年春壽登一百一歲當事詳其事於
朝有司勘驗僉謂持躬孝友立品端方訓子課孫惟守

田園之樂飲和食德彌增松柏之年歷清時百度春秋
沐 聖世四朝雨露前此年登耄耄已邀粟帛之 隆
恩今茲齒過期頤允協表揚之貺典 命下撫臣轉行
地方有司給銀建坊例贈昇平人瑞匾額更蒙異數加
賜 上用緞疋內府帑金封固給發提塘賫送 恩遇
之隆鄉里稱快予備員京師諦觀咨啟曩已心儀其盛
緣與翁生同鄉歸里後晤翁嗣君獻臣於白下傾蓋之
餘索予傳其始末予固嘉江氏之世德尤樂 盛世之
休徵爰爲紀其行畧以俟採風者珥筆云

文埜世五十文綺公暨胡孺人合傳

戴國儒

公先世旌之金鰲人十三世祖模公始自旌遷太平道
泰鄉之西坦至五世祖顯宗公由西坦遷文埜居焉公
父諱廷僮娶姚氏繼納張氏兄弟四長文經次文緯次
文綉而少爲公公生而魁偉慷慨有大節孝友著於家
庭凡所爲務恢弘先業成厥考志兄緯綉並無嗣經亦
蚤夭惟遺孤二公前告尊人以經次子繼綉而以亡次
子繼緯撫孤侄爲擇配多方掖進之如亡子總家政數
十年無私橐身率樸儉於四方文士至者必備款洽給
資斧少讀書能見古人大意後教其子築舍延師盡忠
且敬開一方右文之風焉未幾伯子成諸生仲與叔季

亦以次升膠庠居鄉平易忠厚肝胆無匿顧正己率物
人不敢干以私爭訟多從翁取平嘗慕馬文淵高義蠲
逋焚券甃道成梁塋無歸助貧婚見善如弗及歲值凶
稜縮口賑貸復煮粥濟饑者崇禎戊辰間山谷民多嘯
聚公率宗黨力行鄉約故無一躡入公里邑紳數以鄉
飲辟固辭弗就萬厯己未偕侄雲陽遷楊村基人咸謂
公無忝堂構云胡孺人南市邑庠生世珍公女貞靜慧
淑動則軌儀比歸公家業方鼎鼎起孺人瘁身殫力孝
事舅姑紡績針紉夜分不輟處妯娌如女兄弟以居最
少任煩瑣無少辭未幾與孺人同爲婦者俱稱未亡人

治內治外公與孺人必請於姑事庶姑亦如其姑然燕私侍公若莊賓時以溫裕濟公卞急於公所行必婉詢由來情裁理酌故公操履益密孺人雖巾幗懷丈夫志以公儒業未竟嘗願發書香以大門閥嗣君甫總角卽促就外傅凡所爲表公殷懃尊師者靡弗至賦性均平子視其壻女視其媳庭內懿言教諭藹於春煦且喜布施村媪鄰婦有乞貸者悉所有均之聞公有義舉輒欣然樂成之御下有恩紀無詈言遽色卒門庭肅穆無嘻噓之聲訓諸子以和訓諸婦以義視公所嘗垂教倍加警焉子四長之鯤次之鮫繼兄緯次之鯉次之鯨並邑

庠生女三長適胡次適黃次適許諸孫亭亭玉立曾孫亦雀起後先輝映不減謝庭芝蘭也夫丈夫處世末流慎矩矱謹邊幅輒矯然自命或有簞食壺漿之德益詡詡焉冀長鳴於人視公澤於躬而式於家惠及里閭爲風教砥柱耻以名動當世其度量何如也倘所謂隱君子而陰行其善者非耶孺人以林下風雞鳴戒旦克與有成冀缺之野相敬如賓霸陵之遊偕隱不倦於以克昌厥後聲翔士林永光其遺緒吾又烏乎測之哉姑次其畧以俟後之採風者

崇禎壬午孟春月

又^{五十}文緯公配陳孺人貞節行狀

姪之鯤

伯母氏望僊鄉陳樞公女歸配於伯父緯爲余弟之鯨
嗣母伯父先娶於汪生女一汪故求如德耀其人以爲
之配聞伯母賢娶之門內相莊若賓友伯父苦志業儒
伯母紡績佐讀甫五年伯父染痘疹禱醮醫藥百盡艱
瘁無驗竟以是歿伯母呼天捨地絕而復甦於是有娠
三月矣不死不忍欲死不敢躊躇大義思唯邀靈於天
得以男產死可不在今日爲之禁情視殮後衽滿產女
慘慟欲絕吾大父母臨門諭之曰而向忍死爲夫嗣爾
今即女猶有繼嗣一事可成而志未幾吾弟之鯨生伯
母執前言以請襁抱過房告墳告廟又合親族而告之

延保母護乳哺稍長擇師教督蚤夜隄防靡間歲年既
而男爲之室女爲之家遣女奩財不以長非己出而非
不以次爲己出而豐待兩倩亦如之事舅姑敬謹倍常
嘗勉詔叔伯母莫以纖毫介介妯娌難得無異兄弟下
逮婢使寬溫無間鄰有乏困恆約己賙賑之方伯母來
歸時年二十守志時年二十有四自立嗣後既幸夫祀
得延大典無所憾略無矜激形於意言且視少長兒婦
輩悉如己出如鯤及鯉與鯨叨一衣冠得一子媳伯母
之歡快一同於之鯨聞室有嗔怒聲出理言曉諭之莫
不愧解數十年間蘊髻函珥屏形歛影織夏紡冬茹荼

若飴比之鮫成立廼悉挈家付與時諸孫繞膝少者含
飴弄之大者義方訓之壽終於今年二月二十二日享
年七十有四 崇禎庚辰四月

又五十元鉅公實錄

遂安令里人

周光啟

公學名之龍號雲陽文經公長子才華敏贍英年失怙
恃能孝養祖父母撫幼弟友愛長遊成均講龍溪良知
之學嘗賦詩見志祭酒焦澹園先生器重之歸自京師
偕族營祖廟修祀典訂條約重整文塾規模郡邑讞獄
有經歲留滯而待決於公之數言者雖豪右奸胥莫不
靡然帖服凡姻屬老而無依貧不能自存者悉就養於

公卒爲之殯萬厯己未公以大父夙志與叔彬吾公卜
居楊村厥後瓜瓞綿綿丕基式廓有陰德之報焉

又五十元昭公實錄

襄陽令里人

崔瑤

公學名之鯤字鱗伯號天池文綺公長子性好學博通
經史韶齡五藝遊庠然不屑屑章句探本尋源得伊川
唵風弄月之意居家敦孝友怡怡如也與人處坦白和
易然遇事剛斷持大義未嘗脂韋殉人文綺公喬遷公
實成之事關周親族黨不惜財力以身仔肩者二十餘
年尤好親賢禮士雖貧交踵至相接謹然若周急扶危
解紛排難循循誘人公皆習行之屢試南畿不偶校書

課子屏跡高尚每咏離騷擊壤泌水自樂人有太丘之
望云崇禎辛巳蔡邕侯扁旌云德萃昆玉

又元朗公實錄

儒學教諭嶧山

倪離梧

公學名之鯨字鱗仲文緯公繼子也性穎悟嗜學制藝
如桃花流水別開蹊徑試輒擅場常嘿坐體會本來性
靈躬行孝友門庭雍穆且樂善喜施除道路瘞無主骸
歲飢解囊出粟分諸父黨隣里之貧者所謂好行其德
以濟人利物爲心者也惜天靳其年未竟所施

又元東公實錄

儒學訓導

陳以直

公學名之鯨字起化文綺公三子也勵志潛修寒暑不

越戶限善屬文尤精讎校與弟元默公同年遊邑庠屢
試優擢居家崇實黜華恭兄友弟先人未竟之緒時篤
不忘尤謹然諾慎取予訓子弟矩矱森如親屬友僚貧
而無告者捐貲賑之視近今猥薄之習不啻霄壤矣

又五十
二世景晟公實錄

里人胡文煥

公字明卿元鈺公次子治家有法積而能散處昆季式
好無尤撫猶子恩不掩義族有忿爭不惜財力爲之排
解嘗置義田以備孝享燕兄弟并贍親屬貧而無告者
公義社爲最又建亭村路輸田數畝煮茗以沃行人歲
飢則施米寒則施絮鄉人頌之數與審筵邑侯學博扁

旌者五仁聲義聞播諸鄉邑公亦人傑也哉

又 五十六世 日寧公贊

胡任輿

穆乎其容冲乎其氣而不知其可尋可尺無意無必蓋將蓄其能以有爲而姑與庸伍俗匹然已恢恢乎絕塵而奔而信爲驥足之逸

又 遐公女節烈行狀

從祀孝廉

周萬年

氏生萬厯乙卯幼失怙恃託養於伯性篤摯貞介及笄適同里汪生諱新老者生嗜學家窘因舌佃於新安奉養二親獨氏是賴紡織針紝以度饔飧甫一載姑逝明年翁再娶氏事之尤謹以夫束脩微薄不能孝養減己

膳無怨言居常履不踰閭卽近鄰罕識其艱苦狀而家
益窘生抑鬱成疾氏曲譬勸竭力供醫藥祈祝無所
不至今春疾漸篤朝夕顛天願代刲股以進終弗愈因
語其姆曰夫倘不祿吾惟有相從泉下耳一夕臥室赤
光若火熾家人驚視之則氏獨居也衆莫測其徵無何
五月十一日夫死氏號痛跌撞絕而復甦者三家人窺
其欲死狀環衛之次早志弗遂旋止悲掩涕言動晏如
將夫故衣盡浣之以殮又將己服罄飭以待徧出什用
家具還其宿貸者卽升米兩盞在所必償餘假分寄以
需異日用守者懈其防而老婢未退徐謂曰爾饑矣盍

食婢出戶卽經於夫側人覺而救無及矣計其時與夫
實差半晝云殮時顏面如生年僅十九遠近聞之莫不
惋悼始知嚮熒熒異光殆兆此歟嗟嗟氏歸夫僅四載
夫且強半於外又值家室之艱難孤燈永夜惟是紡車
相對迺以奇窮而爲此奇節異矣氏家恐以此相累匿
而不舉里老因未呈縣乃未半月而同鄉陳烈女死通
邑爲之闡揚觀風者卽爲題請嗚呼均一烈也而顯晦
懸殊若此余於江多知交敬識其顛末以貽江氏以俟
夫闡幽揚微有維持世教之責者 崇禎癸酉十月

乙卯峯青按婦人內夫家此傳本應刪雜惟節烈如此夫家既未舉報周孝廉不得已而爲文以
傳又既登前譜女甯復聽其湮沒乎故破例存之

